

中央研究院歷史語言研究所校印

明武宗寶訓

明武宗寶訓

大明武宗毅皇帝寶訓序

朕惟寶錄以備紀載寶訓以昭典則一代之制存焉不可以或廢也我

皇兄武宗承天達道英肅睿哲昭德顯功宏文思孝毅皇帝纘承大業臨御天下十有七年凡所舉措巨細若否昭然具在朕受

遺詔入正大統爰稽故實命館閣儒臣攷古義例悉心纂集既為寶錄而珍襲之又於紀載之中取其言行政事有足法者得一百五十一條釐為寶訓十卷以詔來裔於戲是固一代之制也而可泯乎抑嘗聞之粵昔帝王率有典謨以垂大訓中世令主道雖有間而法令條格

未嘗不備亦未嘗不足以範當時式來裔也我朝  
列聖實兼總之道無不至法無不立以為子孫臣民之寶  
者蓋世而同符矣仰惟

皇兄卽祚以來

祖宗之法罔不率由惟英武之資奮勵之志則有不可羈  
者故北出觀兵則心存雪耻南巡問罪則義在除殘羣  
雄入於彀中奸宄磔於機上有燭奸之明而不赦於近  
有獨斷之力而不昵以情此亦可謂恢廓大度雄才勇  
畧之君也朕嗣厥服方崇古訓守遺矩以臣不逮顧於  
斯可無述邪因併為序揭諸簡端庶幾存古之法以附  
於我

祖宗列聖之後子孫臣民永以為鑒用畢朕孜孜敬承之意云

嘉靖四年六月十二日

明武宗實訓 序

皇明實錄 卷一百一十五

大明武宗毅皇帝實訓序終

大明武宗毅皇帝實訓目錄

○卷之一

聖孝

聖學

謹天戒

英斷

聰察

聽納

崇儒

興學

禮大臣

表功臣

尚賢

褒忠節

戒諭臣下

戒將臣

○卷之二

嚴考察

禁貪

去冗

抑近習

重恩蔭

厚親

正宗藩

褒諭宗室

戒宗室

目錄

目錄

明武宗實訓 目錄

臣明實言

目錄

討叛

節用

勵俗

正祀典

嚴宮禁

恤民

寬貸

賑濟

掩骼

弭盜

恤刑

兵政

屯田

馬政

恤軍士

備邊

馭外國

優遠人

大明武宗毅皇帝實訓目錄終



大明武宗毅皇帝實訓卷之一

光祿大夫柱國少傅兼太子太傅禮部尚書武英殿大學士臣呂本誠校

南京禮部祠祭清吏司郎中臣陳汝霖

南京兵部職方清吏司主事臣朱錦謹閱

南京工部虞衡清吏司郎中臣呂胤昌

聖孝

○弘治十八年六月甲子勅諭禮部曰自昔聖帝明王治天下必先盡尊親之道以悖化原此天地之常經古今所不能易者恭惟我

聖祖母皇太后坤德之懿克配

皇祖仁慈燾後自

皇考以暨予一人

聖母皇后淑德貞順表正宮闈誕育眇躬劬勞備至

兩宮恩德莫罄名言朕初嗣丕基圖報允切稽諸訓典厥

有彛章宜各極尊稱均隆至養茲將恭上

聖祖母尊號曰

太皇太后

聖母尊號曰

皇太后爾禮部其擇日具儀以聞

○十月乙丑以

孝宗敬皇帝梓宮安厝

山陵命駙馬都尉蔡震護喪賜之勅曰茲

皇考梓宮即遠朕以嗣守

宗社祗循舊章不敢有違爾為國戚特遣護喪凡

山陵道途祭奠及一應喪事皆以屬爾必欽必慎用副朕

意復勅英國公張懋曰凡防護及執役官旗軍校夫匠

人等俱宜遵守法度不許沿途傷人田苗及縱放驢馬

作踐亦毋得假以炊飯等項名色擅到人家攪擾及搶

掠柴草等物如違輕則聽爾量情懲治重則奏聞區處

爾須竭誠効力盡心管理勿或須臾怠忽有負委任爾

其敬之慎之

○正德元年二月乙卯巡撫都御史王璟請革皇庄未有

俞旨其在真定等府寧晉等縣者太監夏綬請歲加蒿

場之稅又欲勿聽小民爭訟其在靜海永清隆平等縣者少監傅琢等請遣官履畝覈實以便管理小河之在寧晉庄前者太監張峻等又欲稅往來客貨皆從之又以庄田之故差官校齎駕帖逮捕民魯堂等二百餘人環及都給事中張文監察御史葉永秀等皆劾言其不便戶部初集廷臣議謂千百頃瑣瑣之利恐不足以孝養

兩宮請革皇庄之名通給小民領種有旨令再議於是尚書韓又等覆題謂畿民當加存恤若謂庄田以奉養兩宮不可給散小民則宜移文巡撫官覈實召人佃種畝徵銀三分解部輸內庫進用其管庄內官悉召還底地

方得免侵漁之害

上曰卿等意在為國為民所言良是但朕奉順

慈闈事非得已管庄各留內官一人校尉十人餘悉召還  
子粒如擬徵銀不許分毫多取沿途性來厨傳俱止勿  
給敢有仍前生事為民害者令巡按御史具實以聞

○正德五年十一月丙辰勅諭禮部朕為天子之孝尊親  
為大蓋非徒養以天下亦有顯揚之道焉朕生不逮

皇祖登違

皇考嗣有大業天下之養備於

兩宮乃於即位之初恭上

尊號而徵稱未盡中心歎焉比以太監張永奉命出師平

定叛亂奏除姦賊朕用宣布政化以成太和凡我臣民

欣欣望治仰惟

列聖眷佑圖報無由亦惟我

聖祖母太皇太后保護之恩

聖母皇太后鞠育之勞至深至厚爰據舊章告諸

郊廟

社稷各盡徽稱以彰

聖德以稱朕尊

親之意爾禮部其擇日具儀以聞

聖學

○弘治十八年十月己卯大學士劉健等言人君之治天

下必先講學明理正心脩德然後可以裁決政務終  
臣民故

累朝列聖嗣位之初必大開經筵每月二次令翰林春坊  
講說經史公卿大臣分班環聽又於每日專令儒臣講  
讀使工夫接續聞見開廣百有餘年太平功業皆由此  
致仰惟

皇上昔在春宮日勤講學克舜孔子之道固以得其大綱  
先帝顧命臣等惓惓以進講為念向來

梓宮在殯

聖孝方殷萬幾之外不遑他務臣等竊恐  
聖心未有所繫深以為憂今

山陵事畢祔廟禮成即欲請開經筵但殿宇高廣天氣向寒且事體重大禮儀繁盛倉猝之間似難舉事欲姑俟明年又恐曠日持久有誤

聖學伏覲

先帝初年日講常至歲暮不輟臣等擬於十一月初二日為始伏乞

聖明遵照

先朝事例每日御文華殿煖閣令臣等兩次進講則

聖學可成太平可致實

宗社萬年無疆之慶除經筵事宜俟明春別請今將日講儀注條上一伏覲



皇上在春宮講讀論語尚書各未終卷。合於每日接續

講讀先讀論語五遍次讀尚書五遍講官各隨即講明

講畢各官皆退一講讀後

皇上裁決政務有暇即看字體隨

聖意寫字一幅不拘多寡俟午講時臣等恭看進呈一近

午初時講大學衍義歷代通鑑纂要講畢各退一每日

各官講讀畢或

聖心於書義有疑即問臣等再用直解務求明白

上曰朕以哀疚故久輟講今聞卿等述

先帝顧命知講學誠不可緩其如期舉行

○正德元年正月戊戌命太師兼太子太師英國公張懋

少師兼太子太師吏部尚書華蓋殿大學士劉健知經筵事少傅兼太子太傅戶部尚書謹身殿大學士李東陽少傅兼太子太傅禮部尚書武英殿大學士謝遷同知經筵事賜之勅曰朕聞帝王之道具在經典非講學無以明肆經筵之設其來尚矣我

祖宗列聖相承尤惓惓焉朕以眇躬嗣承丕緒永惟負荷之艱夙夜兢兢其何敢暇逸茲將以二月初一日御經筵命爾懋爾健知經筵事爾東陽爾遷同知經筵事禮部右侍郎王華詹事府少詹事兼翰林院學士劉機江瀾楊廷和太常寺少卿兼翰林院侍講學士楊時揚國子監祭酒張灤翰林院學士劉忠白弢劉春太常寺少

卿兼翰林院侍讀費宏左春坊左庶子兼翰林院侍讀  
毛澄左諭德兼翰林院侍講毛紀傅珪右春坊右諭德  
兼翰林院侍講蔣冕翰林院侍讀羅玘修撰石琮兼經  
筵官健東陽遷并機廷和鉞宏日侍講讀翰林院等衙  
門儒臣分直侍講夫君以講學修德為要臣以責難陳  
善為忠卿等其高稽於古訓啓心沃慮凡理欲消長之  
幾政治得失之故世道興衰之迹明白開陳以格朕志  
毋有所隱務俾正學日新臻于至理斯朕得以仰副  
上天之眷命與

祖宗之付托而卿等引君當道亦與有無窮之休欽哉

謹天戒

弘治十八年八月辛巳六科給事中周璽等十三道御史耿明等以淫雨為灾各上疏言天變不虛咎在欺蔽通者侍郎李溫等通賄權奸累劾不去主事王綸奉勅覈實功次為太監苗達力阻裁減添設內臣有司請如詔而不行清理內庫錢糧已議會官而終委之司禮監指揮田忠等督工

山陵縱軍遊役兵部執奏竟獲宥免請寘諸欺蔽者于法以消天變掌欽天監事少卿吳昊亦言自五月至今恒雨其占為上慢下暴號令無時與玩狎不恭之人又為天子居喪不哀弋獵無度奢侈繁興百姓愁怨之應俱下禮部議謂宜納璽等言請自今防微慮患親賢遠奸

昧冀臨朝恭儉率下謹大喪則極哀斷大政則勿感  
災沴漸息天意可回

上曰災異疊見實由人事乖違事關朕躬者自當警飭爾  
中外文武羣臣宜同加修省勉圖報稱凡政務所當興  
革者諸司其條具以聞務切時弊毋事虛文

○九月丙戌禮科都給事中周璽言日者靈雨方霽星變  
繼作皆陽微陰盛之象請親君子遠小人修政事攘夷  
狄絕近倖之侵權黜姦貪之黨國延訪輔臣及九卿以  
求理亂之幾務盡修省之實

上曰星變事重所司即看詳以聞禮部覆素人君之心與  
天流通爾

陛下引咎責躬總攬乾綱敬修人事如壘所言仍卜日遣

官祭告

天地

宗廟

社稷使精誠感格上下交通則和氣充塞星變可消

上是之乃命英國公張懋射馬都尉蔡震惠安伯張偉分

行祭告

○正德元年三月丁未南京東安門皇牆脊瓦并大報恩  
寺塔以雷震而損守備太監傅容等既修葺皇牆乃奏  
欲并修寺塔工部議根本重地雷震禁垣其災非他處  
可也天心示戒

祖宗之靈恐非弗寧若行修理寺塔興土木之工勞軍民  
之力所以答天戒也願已之

上是其言詔南京災變非常朕心祇惧其令守備等官  
加修省以回天意

○六月庚午禮部尚書張昇等言天人一理人事失於下  
則天變應於上茲有風雷雨雹非常之變內震西中門  
柱脊外傷

天地壇門臬樹木夫西中門乃禁密要途

天地壇乃明裡重地而風雷乃天之號令也於此震驚其  
可忽乎詩云敬天之怒無敢戲豫敬天之渝無敢馳驅  
戲豫若鷹犬弋獵歌舞遊宴之類馳驅若騎射馳驟出

入無時之類是已帝舜曰勅天之命惟時惟幾惟時川  
無時而不戒勅何暇於戲豫惟幾則無事而不戒勅何  
暇於馳驅伏望謹詩人戲豫馳驅之戒法大舜惟時惟  
幾之勤端居內省講學修德親賢遠奸審於舉措朝夕  
精思何以致此且今府藏空虛生民困苦亟宜惜財恤  
下不可濫賞輕費請廣開言路俯賜優容仍勅諸司同  
加修省振舉職務撫輯軍民沿邊守臣訓練軍馬修飭  
武備謹防姦宄保固封疆庶人事盡而天變可回矣  
上曰然災變非常深用恐懼事閑朕躬者自當體行爾內  
外文武臣工宜同心痛加修省以回天意利病之當興  
筆者所司其詳具以聞務切時弊毋事虛文



○十二月丙辰禮部奏明年元旦有朝會宴賞之禮今  
孝宗皇帝未踰大祥又當日食宜免稱賀

上曰三朝日食災變非常朕心驚懼何以賀為諸禮其悉  
免之

○正德五年三月辛未詔今春不雨風霾累日朕念愚民  
犯法者多情可憫惻自正德五年三月十六日以前逃  
軍強盜私鹽除正犯外親屬窩主鄰佑連坐發遣充軍  
擺站者法司即稽其數兵部亟移文各處軍衛有司釋  
之三法司錦衣衛見問未結并已結未遣者皆免發遣  
枷號者即與開枷依律問擬徒流以下者減等答罪無  
干証者盡釋之強盜正犯通行審實監候如有攀指寃

皇明實訓 正德一  
抑情可矜疑者具奏定奪其餘充軍者兵部還會法司  
開具以聞內外選軍自文書到日為始限三箇月以裏  
自首免罪於是大學士李東陽等奏伏蒙

皇上以久旱風霾兩降諭旨命羣臣致齋祭告

天地

社稷山川仍勅兵部法司鞠讞有罪之人多從寬貸臣等  
聞命欣躍至於感泣中外傳播歡聲動地所以安人心  
回天意者端在於此臣等不能盡言啓沃先事開陳負  
咎含愧已非一日幸親

聖心開悟輒有一二仰干

天聽王府選校與選軍同窩主隣佑連累發遣充軍擺站

并見未問結已問結未發遣者乞照例釋放傾使假銀  
偽造印信舉放私信較之強盜有間除正犯外窩正  
佑亦乞放免仍將傾使低銀正犯止照本律問罪犯罪  
充軍正犯已故家屬該發遣隨住者查有親男照例發  
遣無子婦人一應家屬乞免發遣已發遣者并行釋放  
死罪重囚奏訴三次者本犯乞免加罪家屬免充軍婦  
人無夫者免配邊軍凡犯罪家產沒官除謀叛以上重  
罪外其餘近例該沒官者並免沒官兩法司錦衣衛見  
監死罪重囚除強盜已有旨其餘乞照通年熟本事例  
開奏定奪南京見監并枷號輕重罪囚亦照在京近奉  
恩例一體施行文武官罰未違限若實官貧不係故意

遷延者乞再限三月仍免加倍上納各處獲盜數多中間不無板指冤抑見問并續獲者乞令各該捕盜等官用心嚴審務見贓仗失主并同行上盜之人明白擬奏如或輕信妄拿濫及無辜希圖陞職免罪者事發之日罪有所歸再照正德年間問罪條例近該給事中屈銓奏准頒行乞令三法司議擬歸一請自

上裁永為遵守

上批答曰卿等所言皆有裨於治道具見為國至意朕當悉從而行之

○正德六年七月丙辰

上諭禮部臣曰寧夏底定皆

天地百神眷佑所致未伸告謝邇者四方災異仍盜賊  
繼起荼毒生靈朕心惕然禮部其擇日遣官祭告於是  
遣英國公張懋新寧伯譚祐會昌侯孫銘祭告

天地

宗廟

社稷山川禮部右侍郎李遜學祭告

天壽山之神其鍾山之神及天下嶽鎮海瀆俱令守臣祭  
告

○正德七年五月甲辰巡按雲南監察御史張羽言雲南  
地震甚於他省郡縣官多不得人雖嘗按治其罪而荒  
裔之外吏政尚同乞勅巡撫三司等官痛加修省以弭

災異禮部尚書傅珪等覆以古之帝王遇災而惧故能轉禍為福今歲天鼓鳴流星見陰霾四起天雨黃沙火災異常盜賊猖獗而且地屢震不特雲南一方而已前此嘗發給音修省及今和氣未臻災變滋甚宜推羽言通行在京文武衙門并在外鎮巡司府等官令其思咎勉盡職業其有利可興弊可革者開具上陳尤望

皇上祇畏天心克謹天戒思所以感召之由行所以消復之實願養天和講求聖學延訪民隱樽節財用早朝以警勵人心深居以察識時變不作無益而害有益不忘遠慮而廢通言俾省部臺諫各盡其職則上下交修而天意可矣得旨天變示戒文武百官其同加修省在外

首速移文諭之

○正德九年正月壬午以乾清宮災

上服淺淡色服御奉天門視朝文武羣臣行奉慰禮是日  
徹寶座不設遂降勅諭羣臣曰朕恭承

天命嗣守

祖宗成業夙夜孜孜勉圖治理乃者乾清宮災朕心警惶  
莫知攸措殆以敬

天事神之禮有未能盡

祖宗列聖之法有未能守用舍或有未當刑罰或有未公  
征斂太重有傷民財工役繁興有勞民力讒諛並進而  
直言不聞賄賂公行而政體悠謬姦貪弄法而職業多

未能修撫剿失宜而盜賊尚未見息有一於此皆足以傷和致災靜言思之悔悟方切爾文武羣臣受朕委任義均休戚其各協力祇承痛加修省事闕朕躬及時政闕夫軍民利病宜直言無隱庶俾朕有所警惧以答

上天仁愛謹告之意故諭

○二月戊申永平等府旱潦相仍民茹草根樹皮且盡至有闔室饑死者巡撫都御史王倬以聞且請差官賑濟戶部議覆

上曰畿甸之民至此朕心惻然其今倬發所在倉庫賑之仍輸通州糧十萬石減價糶散一應歲賦亟勘報蠲免諸救荒事宜悉聽施行



○正德十二年五月己亥夜火隕於都察院獄旋博久之始減都御史王璟以聞詔曰火隕獄中無乃刑罰失中與爾璟宜率厥屬修省明慎用刑毋致冤抑以弭茲變仍申飭巡警豫防火災毋忽

英斷

○正德五年八月甲午太監張永還自寧夏密奏劉瑾不法十七事

上出永奏示內閣遂降旨曰朕嗣承大業務期法

祖修文以安天下委劉瑾以腹心整理庶務瑾乃不體朕心蒙蔽專擅變亂成憲肆行酷虐使官員軍民無不受害愁嘆之聲有干和氣朕深悔焉瑾降奉御令風揚聞

任文武官員順從緘默多非得已今皆貸之各處新查  
屯田文冊即令燒燬照舊徵收巡捕巡鹽查盤等項新  
設官員俱革去法司問擬囚犯但有新例俱改正照舊  
制行允瑾所行有虧國體者法司即會衆官一一條具  
奏革瑾所當坐罪名從重議擬以聞及籍其家金銀累  
數百萬其他寶貨不可勝計又得偽璽一牙牌五百扇  
中所置刀二及衣甲弓弩之屬

上大怒曰瑾果反乃以付獄於是六科給事中謝納十三  
道御史賀恭等瑾罪

上今法司錦衣衛執瑾於午門前會多官鞠訊皆謂瑾罪  
大惡極反形已具當寘重典獄

上命徇於市凌遲三日不必覆奏仍以招情并處決圖狀  
榜示天下行刑之日仇家每以一錢易一鬻有得而生  
噉之者海內聞之莫不踴躍相賀瑾竊柄五年驕橫無  
上生殺予奪皆自巳出

累朝成憲變易幾盡自古宦官肆虐未有如瑾之甚者

上信任既久威柄已移一旦震怒去之不疑卒能正其法  
由

上之英斷也

○正德六年八月甲申提督軍務侍郎陸完師出涿州忽  
報賊在固安

上召大學士李東陽楊廷和梁儲至左順門內

上南向立問曰賊在東而師乃西出恐緩不及事欲令兵部追還完等令東如何東陽對曰甚當且行未遠一二日內可至賊舡至水套自來送死官軍併力擒之甚易但恐人心不齊向來累失事機正坐於此今官軍在北宜亟勅東南諸將隄備

上曰張俊等皆在南料亦無害奏畢

上復諭東陽等曰先生用心命賜羊酒而退

○正德十四年五月丙辰遣太監賴義駙馬都尉崔元都御史顏頤壽往江西宣諭寧王宸濠先是御史蕭淮奏宸濠不遵

祖訓凌轢官府虐害忠貞招納亡命掠殺亡辜者數百人

沒富民資產萬數西山牧馬幾萬匹南康松船亦有千艘酷虐遍於江西而流毒及於他省所遣旗校及內使接踵京師或潛住終年不知所營何事且羣姦為之黨者如致仕都御史李士實儀賓顧官祥指揮葛江王信引禮丁墳內使陳賢壽山熊壽徐欽梁偉義官倪慶盧孔章徐紀趙七謝培省祭官黃海秦梁舍人李顯忠校尉宣五火信樂工秦榮皆入府書夜密謀又招致建昌賊首凌十一閔廿四等以為羽翼不早制之臣恐將來之患有不可勝言者乞勅錦衣衛逮其黨至京誅之其潛住京師者緝補重治所占田產皆給還軍民仍革其護衛一裁以法鎮守太監畢真同惡相濟巡撫都御史

孫燧巡按御史林瀚不能糾正反為獻諛宜究其罪原  
任江西副使李夢陽僉事李淳王圭叅政白金叅議王  
忭附勢助虐宜削奪其官為民左布政使鄭岳充軍副  
使胡世寧因忤濠得罪者宜亟起用朱寧見之持其疏  
還家數日屢於

上前詆淮妄言離間宜罪

上曰虛實久當見之果誣淮將焉往

上遂以淮奏示內閣大學士楊廷和等令議處廷和曰宜如  
宣宗處趙府故事遣貴近勲戚大臣各一人持書以往宣諭  
皇上保全宗室至意令王改過自新庶彰朝廷親仁之仁  
而犯法亦不廢矣

上以為然會六科十三道徐之鸞沈灼等交論其事

上復遣司禮監官召皇親駙馬文武諸大臣於左順門諭令集議皆如廷和言於是勅義等實書往諭畧曰叔祖在宗室中屬尊望重朝廷所以禮待者視他宗室不同但府中事多塔物議流傳道路不無可疑往者典寶副閻順等奏諸不法朕未遽信近言官所奏亦與順同在廷群臣咸謂

宗社大計宜存遠慮朕念至親且不深究然隱忍不言彼此懷疑亦非兩全之道昔我

高祖考宣宗皇帝嘗因趙府有頌言特遣駙馬袁容等貽書戒諭即幡然改悔獻還護衛至今永享富貴朕今亦

為叔祖計遣太監賴義等齎書奉告可倣此意以原革  
護衛并屯田獻還所奪官民田土亦皆復其故主賊首  
如凌十一等及其黨散遣歸鄉諸撥置者俱不許在府  
出入朕亦俯從寬典並不深究則朝廷與宗室兩盡其  
道永享太平之福矣此朕至情

天地

祖宗寔所共鑒叔祖其圖之

○十一月丁巳命羈管朱寧于臨清初寧與宸濠通謀事

頗洩深自掩覆

上之南征也已留寧居守寧恐難

上左右為人所發乃私求扈從及



駕發京師既出正陽門始傳旨令寧俱南江彬素與爭寵至臨清進間止寧董皇店役遂白其通濠狀

上大怒曰我固疑之黠奴乃敢爾時將渡淮遂令即所在拘繫之又密遣人至京收其妻子并籍其家後駕還與諸從濠逆者俱俘以入竟磔于市妻子沒官

聰察

○正德元年九月辛卯大學士劉健李東陽謝遷以太監崔杲奏乞引鹽工部為之請勅遂上言

祖宗舊制鹽法本以備邊近年奏討數多成法盡壞

先帝深知其弊特令該部查處臣等親承面命議擬施行而

龍馭忽升事功未就恭遇

皇上渙頒明詔痛革弊端特令大臣分投清理天下傳誦  
稱為

聖明柰何清理之使方行織造之命隨下生財之源既塞  
蠹財之弊復生臣等若坐視不言依阿順旨不惟負

先帝面託之重亦且虧

皇上新政之明前勅決不敢撰寫况太監崔杲奏討引塩  
不過變賣銀兩若戶部支與價銀尤為省徑若仍給引  
鹽聽其支賣必火帶數多向來作弊射利之人因而附  
搭則鹽法之壞愈甚於前清理之官殆為虛設東南困  
敝之民恐生不測西北兵荒之急何以應之臣等之憂

有不正此伏望收回成命止照該部原擬給與價銀織造則供用不之鹽法可行於是五府九卿科道等官亦上疏論其不可時

上意未決猶欲全與鹽引乃於日講罷召健等復至暖閣問曰昨差承運庫太監王贊崔杲往南京浙江織造瓚等乞長蘆一萬二千引戶部止與六千引半與價銀今可全與之健等同奏曰如是已足用矣

上曰既與半價何不全與引鹽健等對曰戶部亦是為朝廷樽節用度

上曰該部既欲節用何不留此半價却以引鹽與之聽其變賣不亦兩便乎健等曰價銀有限不若引鹽之費為

多

上曰何故東陽對曰鹽引數有夾帶如引一帝便夾帶數  
十引以此私鹽壅滯官鹽不行

先帝臨終銳意整理鹽法正今日急務也不可不為速慮  
上曰若有夾帶事覺朝廷自有法度處之東陽對曰此輩  
若得明旨即於船上張揭黃旗書寫欵賜皇鹽字樣勢  
焰烜赫州縣驛遞官吏酬應少誤即加笞辱亦隱忍受  
之至於鹽商竈戶雖凌虐萬狀誰敢呼冤所以不若禁  
之於始徒等亦共言之

上正色曰天下事豈專是內官壞了譬如十箇人中也僅  
有三四箇好人壞事者十常六七先生輩亦自知之如

是者言之至再蓋是時已有先入之說矣

上復謂曰此事務要全行健等奏曰容臣等再議因叩頭  
出至殿中司禮監官追達

聖意亦答曰已奏過再議監官遽回奏云先生輩已承行  
矣健等至閣復上疏極言自古帝王以從諫為聖拒諫  
為失國家治亂常必由之顧順旨之言易入逆耳之言  
難受故治日常少亂日常多臣等每以此說進於

陛下誠欲

陛下為聖德之君天下成至治之世也今文武公卿臺諫

合詞伏闕皆謂鹽法不可壞而

聖意堅執排羣議而行之就使織造有益姦弊不生然上

明武宗實訓 卷一

虧朝廷納諫之明下失羣臣守法之義所得幾何而所損者不可勝計矣此雖一事關係甚重臣等豈不知順旨者有寵逆耳者獲罪若貪位戀祿殃民誤國則不獨為

陛下之罪人抑亦為天下之罪人萬世之罪人矣區區犬馬之誠猶望

陛下廓天地之量開日月之明俯納羣言仍從初議以光聖德天下幸甚若以臣等迂愚不能仰承

上意則乞別選賢能以充任使將臣等放歸田里以免曠職之愆

上曰昨聞卿等面奏今復覽疏朕心已悟引鹽不必全與

可夫與十分之五餘如議與價銀

○正德十四年九月戊戌

上南巡至臨清山東諸鎮巡官皆從越三日傳令進宴宴具草畧

上視之笑曰慢我何甚竟不怒及宴都御史王珣獻履步緩

上目之神周因林珣謂

上意不測明日復宴都御史龔弘趨進自言姓名蓋恐

上誤以為珣也江彬從旁厲聲叱之龔併罪兩人

上不為動時太監黎鑑家人有以科欵得罪者鑑惧悉所有以獻復取償于有司珣不可鑑以頭觸之遂相鬪爭

鑑泣懇予

上

上曰此必汝有求不遂耳巡撫何敢輒辱汝也鑑語塞而

退蓋

上巡幸所至事每有容且聽察不為左右所惑類此

聽納

○正德元年正月甲午大學士劉健李東陽謝遷疏言竊

見去年

聖駕者牲及時享

太廟內官內使隨從數多今年大祀

郊壇從者又多數倍臣等歷事



累朝見帶刀披甲等項內官甚少聞宣德正統以前尤少  
祖宗深意蓋以敬

天事神為重不敢過為夸耀且執事給役自有定額服食  
供給亦有常限不可過為冗濫故也今祭

大社耕藉田幸太學等禮在邇

社稷先農壇地方窄狹文武羣臣守衛執事自有該用人  
數國子監先師廟庭不過數丈出入門巷不過數尺太  
學師徒數十百人伺候行禮填塞擠雜尚恐不容若增  
添內侍置之何地乞勅司禮監查照正統以前舊制定  
為名數不使仍前混雜庶國體清肅人無竊議臣等又

見每日常朝

駕過文華殿隨從之數漸亦增多內府各監局題本僉事官姓名或至七八十人或至百數十人伏觀

先朝每遇登極之初必一簡選今則但聞陞擢不計年資品級新舊累積賢否混淆光祿寺傳辦卓面日逐加增已至七八十卓承運等庫閑出賞賜各該衙門役使人匠不知幾何蟒龍玉帶內府乘馬不論其數耗竭財用壞亂名器未及一年已至於此仰惟

皇上春秋鼎盛將隆億萬載無窮之祚此後何以處之况自奉詔書查革冗濫文武官員俱曾革去數百各門倉庫及各處分守守備等項內官照舊不動恐非朝廷大公至正之道臣等固嘗論奏奉旨准行因循至今其弊

愈甚臣等謬膺顧命叨任腹心日夜憂惶莫知所措不敢不昧死盡言尤望

皇上大奮乾剛特施睿斷將前項冗官通行裁革非分賞賜服色盡行追還使制度光復於

祖宗詔令不失於天下實

社稷之福蒼生之幸也

上嘉納之曰隨從內使朕今有處分矣

二月癸酉大學士劉健李東陽謝遷復上流言臣等俱以愚庸遭遇

先帝委以腹心臨終顧命惓惓以

陛下為托臣等痛心刻骨誓以死報恭惟即位之初詔書

一下天下延頸懸望太平而朝令夕改迄無寧日百官  
庶府倣效成風非惟廢格不行抑且變易殆盡建言者  
以為多言幹事者以為生事累章執奏則謂之再擾查  
革弊政則為之紛更憂在於民生國計則若罔聞知事  
涉於近幸貴戚則牢不可破以一二人之私恩壞百年  
之定制而不顧以一二人之邪說遠滿朝之公論而不  
恤臣等切居重地徒擁虛銜或旨從中出畧不預聞或  
有所議擬徑行改易似此之類不能備舉臣等心知不  
可義所當言累有論列多不見允比為戶兵等部議處  
鹽法功次等事具本上陳盡言利害拱俟數日未蒙批  
答若以臣等言是則宜俯賜施行臣等言非則亦明加

斥責而乃留中不加視之若無使臣等趨向不明進退  
無遽深憂極慮寢令弗寧亦知內告外順人情之常但  
知政出多門咎歸臣寺捫心反顧無以自明展轉於衷  
殆非獲已嘗聞宋儒朱熹有曰一日立乎其位則一日  
業乎其官一日不得乎其官則不敢一日立乎其位今  
勢窮理盡已至於斯若諉顧命之名而不盡輔導之實  
可俯玩惕竊祿苟容則既負

先帝又負

陛下不敢取譏當世亦將貽笑方來用是共瀝愚誠上塵  
天聽伏乞

聖明矜察特允退休別選賢能代茲重任少逭分毫之罪

幸廷犬馬之年則

陛下優待舊臣之心勵精新政之義兩盡而無遺矣

上曰卿等切切為治之心朕已知悉所言事待斟酌行其

悉心輔導如故

○戶部覆議都給事中鄒軒等所言裕民止盜事其一謂  
貴戚藉所賜庄田侵奪民產蓋長寧伯周或賜田之在  
景州東光境內者實係民人高崇等世業往年為奸民  
讐害投獻中貴遂以賜或而崇懇焉逮至錦衣衛鞠問  
已明宜令踏勘官從公斷理勿畏勢以虐民仍通行諸  
貴近或嘗受獻者俱遵詔旨亟以還民其一謂內府各  
監局各庫各倉場及各門內官內使人等每緣收納錢

糧刻削無厭

先帝晚年洞察民隱嘗特降明旨嚴加戒諭今復玩愒恬不知畏故諸所解納百方巧取粟米布絹之價徃徃倍於時估民甚苦之宜重刻戒諭之旨於諸司懸布永示遵守其一謂庄田子粒貪暴者違例自收蓋公侯田土及牧馬草場畝徵銀三分令佃戶自赴有司上納而後聽業主領用實慮管庄之人貪暴自恣逼民逃竄也今宜令撫按官重加榜諭或違例致民失業者業主有司一體究問其一謂征稅不經甚至屠宰皆納官錢蓋京城各門宣課司近聞日進供用庫猪肉丁字庫羊皮又歲時一再進送瓜果俱非舊制宜盡行革罷若張家灣蕭

二月

卷一

十九

溝橋二司經過客貨非在彼發賣者宜令徑赴宣課司報稅毋得重征其崇文門分司五百貫以上例該起條者宜如原稅之數勿令加倍各門大小車輛及驢騾負載諸貨宜悉聽巡視御史等官照例收取正稅不許守門內官仍前干與分外過取其一謂珍寶應禁而不之禁蓋近內承運庫太監龍綬等奏謂寶藏庫寶石西珠無可用者欲本部區處進納臣等嘗集府部羣臣詳議時方凋敝未能致此難得之物况

皇上新服厥命正宜屏絕玩以培養儉德宜勅所司選諸內庫所藏取足成冠之禮而止不必過求侈用敢有黃緣舉奏煥煥感



上聽者查照先年處置梁方例重加究治奏入

上是之曰

先帝所頒戒諭之旨其令諸司載州懸布遵行有故違者  
罪無赦時廷臣集議覆綬等以奏留中將一月矣至是  
亦得旨不必買辦

○四月癸丑五府六部等衙門英國公張懋等言自古人  
君未有不以憂勤而興驕佚而壞者益之戒舜曰罔遊  
于逸罔淫於樂成王初政周公作無逸以訓之誠見夫  
廢興之機於此乎係不可以不慎也

大祖高皇帝間關百戰以有天下深慮後世溺於宴安故  
皇明祖訓首謂守成之君常存敬畏以

祖宗憂天下為心則能永受

天之眷顧若生怠慢禍必加焉貽謀之遠蓋與益周公異世而同符也仰惟

皇上嗣位以來日御經筵躬親庶政求治之心恒惧不逮通者忽聞燕閒之際留心騎射甚至羣小雜沓徑出掖門遊觀苑囿縱情逸樂臣等不勝驚惧昔漢文帝從霸陵欲西馳下峻阪其臣袁盎諫曰聖主不乘危不徼倖今騁六龍馳不測山有如馬驚車敗陛下縱自輕李高廟太后何宋孝宗常親鞍馬其臣薛季宣諫曰韃馬之事雖陛下所以習勞振武至於遊之害積于細微銜繫之危起於所忽則不可不慎夫家累千金坐不垂堂蓋

謂所託者重也

陛下負託之重豈但千金之子而乃自擇端拱之步以犯  
垂堂之險萬一御者蹉跌御勅有失左右不及致力將  
如之何臣等竊意

天縱聖明初無此念必左右近侍引之非道

陛下不察而誤諭之臣等實為寒心况去歲以來天異迭  
見若復從事佚樂何以感動

天心夫上天之變不可玩古人之戒不可忽  
聖祖之訓不可忘

宗社之虞不可不慮伏願

陛下居安思危嚴恭寅畏凡騎射遊樂之事一切屏絕親

君子遠小人左右近侍必選老臣謹厚者充之毋使儉  
邪羣小雜乎其間因而上累

聖德有負天下臣民之望

上批答曰卿等所言良是朕皆體而行之

○六月庚午大學士劉健李東陽謝遷言近因災變疊見

伏蒙

陛下恪謹天戒諭令臣等同心修省凡興革事宜諸司自  
當開具奏請臣等職專輔導事關君德者不敢不昧死  
上陳竊惟自古人君必以勤敬為德怠荒為戒經書所  
陳史冊所載昭然可見也伏觀近日以來視朝太遲免  
朝太多奏事漸晚游戲漸厲茲當長夏盛暑之時經筵

日講俱各停止臣等愚昧不知

陛下宮中何以消日奢靡玩戲濫賞妄費非所以崇儉德  
彈射釣獵殺生害物非所以養仁心鷹犬狐兔田野之  
畜不可育於朝廷弓矢甲冑戰鬪不祥之象不可施於  
宮禁夫使聖學久曠正人不親直言不聞下情不達而  
此數者交雜於前則聖賢義理何由而明古今治亂何  
由而知民生困苦而莫伸政事弊壞而莫救其所閔甚  
大臣等實切憂之切見六月中旬風雨飄蕩雷霆震怒  
正殿鴟吻

大廟春獸

天壇樹木以至禁門房柱之類各有摧折燒燬比之四方

皇明實錄

卷一百一十一

十一

奏報者事體尤重天心示警蓋已甚明伏望

陛下惕然省悟奮發乾剛恭已敬德勵精圖治平旦視朝  
依期奏事屏去玩戲放逐鷹犬萬幾之暇將舊日所進  
講章直解不時有閱以開廣聰明窮究義理凡諸司所  
開利弊詳加采納斷在必行庶可以消弭災沴導迎和  
氣上回天意下慰民心誠國家萬萬年之福也

上曰朕聞帝王不能無過而貴於改過覽卿等所言具見  
忠愛之誠朕當從而行之

○正德二年二月己卯大學士李東陽等疏請早朝言自  
古聖帝明王必以克敬克勤為德早朝者勤政之第一  
事也

皇上即位之始常以昧爽視朝中外欣欣望至治頃來  
或多至已時方出人心疑恐伏望自今早朝仍依舊期

一則

聖躬志慮清明二則朝廷氣象嚴肅三則侍從宿衛得免  
疲倦可以整飭朝儀四則文武百官不至懈弛可以理  
辦政務五則鐘鼓有節可以一都市之聽聞六則引奉  
有期可以聳外夷之瞻仰一舉而衆美咸具天下必將

稱頌

聖明此其事易行而其效甚大只在

聖心一轉移之頃爾

上曰卿等所言切於治道朕已知之矣

皇月曆刊

王意一長

十八

○正德六年二月辛丑禮部尚書費宏等上疏言竊惟聰  
明睿智聖質固本于天生高大光明君道必資於聞見  
蓋朝廷之上日有萬幾而事物之來理欲難辨故崇儒  
講學納諫聽言正人君所以成聖德而隆至治者恭惟  
皇上即位之初日御奉天門以臨百辟時御文華殿以親  
儒臣蒞政講學薰資不廢誠大有為之君而足以致太  
平之治者也况今奸佞既除百度釐正人有勵精之望  
治當更化之時故臺諫各摠忠悃上廣

聖聰縷數條陳詳明剴切如給事中潘壘等所謂御經筵  
以勤學謹視朝以勤政處宮寢以養和節出入以養重  
親君子而遠小人斥異端而崇正道停不急之工戒無



益之樂監察御史陳察所謂務講學以明德節嗜欲以  
養心視早朝以聽政凡此數者實端本澄源之論而  
於危明憂治之誠伏願

聖明俯垂聽納見諸施行如堯之舍己從人如湯之檢身  
懋德如此則大孝益隆於繼述

聖德日就於崇高本源既正而政化自爾其更新內治既  
修而外侮不憂其難禦疏入

上曰卿等所言足見憂國恤民至意朕已知之矣

### 崇儒

○正德元年六月辛酉授孔子五十九代孫彥繩為翰林  
院五經博士主衢州廟祀宋之南渡也衍聖公端友危

釋白曲阜徙衢州傳五世至其孫洙而宋亡元世祖召洙至欲令襲爵洙以墳塋在衢力辭乃讓其爵于曲阜宗弟治自是曲阜之後世襲為公而嫡派之在衢者遂無祿衢州知府沈杰求端友後得彥繩請授以官俾世主衢之廟祀且言其先世所賜祭田在西安者五頃洪武初以民田輕則起科未幾有王氏子隨母改通冒孔姓以罪抵法田沒官改徵重稅亦宜減輕以供祭真修葺費禮部議覆

上曰先聖苗裔在衢者齒于齊民朕甚憫之其授之五經博士令世世承襲并減祭田稅以稱朕崇儒重道之意於是博士授之彥繩

○正德二年七月乙卯浙江台州府知府徐鵬舉奏宋儒朱熹仕於浙東講明道學修舉荒政濬河築堤民享澤溉台人德之立祠以祀但祀典出於朝廷歲遠則廢乞令有司撥人役護視祠宇歲供祭品每春秋祭主以本府正官庶報功之典可久而台人之願亦伸矣禮部議覆

上曰朱熹有功斯道遺愛在台固宜有祠其如鵬舉所奏行之

○十一月丙辰授三氏學生員孔聞禮為翰林院五經博士文子思廟祀事時襲封衍聖公孔聞韶奏以子思廟在鄒縣南去魯五十餘里主祀缺人請擇族中之賢者

十一

十一

十

授以博士世職俾主其祀且以母弟聞禮名上

上曰顏孟二子皆有世官奉祀而子思廟在鄒者獨無此  
闕典也聞禮可授翰林院五經博士俾世主其祀

○正德四年七月甲辰三氏學生員顏重禮奏三氏子孫  
自成化初年開貢迄今顏氏未貢一人乞定為資格以  
均之禮部覆議以孔氏子孫在學者十九顏孟子孫在  
學者十一若孔氏仍舊三年一貢每及三貢顏孟輪貢  
一人則均矣

上是之且曰輪貢既均其母令廢學當貢者所司仍慎選  
以充

○九月乙巳以孔承夏為曲阜知縣初曲阜知縣孔承泗

卒族人舉孔公統代之有孔承章承周者赴京奏其過惡吏部乃舉承夏可用而羅公統因劾承章等二人意欲徇私薦其族承懿也乃執付巡按御史究治既而承章等復與承懿潛至京為偵事者所發俱謫戍海南仍賜衍聖公間詔勅曰先聖之道朝廷用之以為治天下之法在爾輩守之則為治家之法承章等首開訟端毀誣宗子以朝廷名爵為私家爭奪之具是先聖不肖子孫也謫之邊戍小懲大戒正用先聖遺法為之教不肖子孫爾且先聖嘗言其身正不令而行爾聞詔尚佩服先訓進學修德與族長管束族人令讀書循法循理以稱朝廷崇重至意今後再有持強挾長朋謀脅制不守

家法為聖門玷者爾即指名具奏必不輕恕故勅

○正德七年十月丁卯先是賊犯闕里勅所司分兵防禦至是衍聖公孔聞詔以慶賀至京師具疏謝

上復批荅曰羣盜為暴至犯闕里朕聞之場馬靡寧其令巡撫官祭告仍量為修葺以慰聖靈

○正德九年三月甲戌山東嘉祥縣修曾子廟成巡按御史李璣請以門人子思配享而以陽膚子襄公明儀沈猶行公明高樂正子春公明宣單居離列于子思後從祀且請御製碑文以垂示無極禮部議覆詔曰顏子廟先朝已有御製碑矣曾廟亦不可無也其令翰林院製文賜之

興學

○正德元年三月甲申

上視國子監是日

上具皮弁服躬謁先師孔子行四拜禮幸彞倫堂祭酒司業講書畢。

駕還宮明日賜竹聖公孔聞韶并三氏子孫祭酒司業學官叢衣及諸生寶鈔越三日賜祭酒司業及諸生勅曰朕肇纘鴻圖率遵舊典特視太學釋奠于先師嘉與諸師儒講論治道厥禮告成惟古帝王在位徽典綏猷以成至化政與教非二也顧建學置官職專而法備所以成德達材俾為世用於政亦有資焉自有經傳以來道

在方冊非心領神會身體而力踐之其何以措諸事業  
朕方躬迪彝教為天下先爾師生尚懋敦乃學惟忠孝  
節義是訓是守以廣業弘化圉四方民物歸於太和庶  
幾復唐虞三代之盛欽哉

禮大臣

○弘治十八年六月乙未大學士劉健李東陽謝遷言

皇上嗣登寶位之初賞臣等各銀三十兩紵絲二表裡已  
頓首拜受近聞戶部奏擬將親王及文武官員賞例通  
為減省竊思帑藏告竭減省賞賜乃不得已而臣等獨  
受厚賞心實不安請辭免

上曰此



先朝故事勿辭已而健等復言昔在

先朝國用充裕此等正賞固不敢辭今府庫空虛加以強寇在邊軍需方急若不痛加樽節目前已不能給後來何以繼之且節用必自貴近始臣等受遺輔政當與國同憂豈可獨受厚賞伏望自今以後一切無名之賞盡皆停止以崇儉德

上復曰朕初嗣位加賚輔臣禮不可廢卿等勿固辭其他財用朕自當樽節

○十月己卯是日早朝退

上御文華殿召內閣臣三人總兵官六人六部尚書都御史至前諭之曰國有大喪加以邊事卿等久勞各賜文

綺三襲仍賜飲饌而退

十一月丙申遣行人存問致仕太子太保吏部尚書王恕初詔天下有司凡致仕大臣九十以上者具奏至是陝西以恕聞

上賜之勅曰卿在

先朝出入臺省直言正色著有令猷及勇退以來壽考康裕年濟九十朕方孝奉

兩宮惟思臣庶惟尊賢養老之典自古有之特遣行人存問并賜羊酒月加食米二石歲加役夫二名以示優眷卿其體朕至意順神葆光益邵乃德以裕後昆抑書有之爾身在外乃心罔不在王至卿有嘉謀謹論尚無所

隱以裨朕之不逮斯不亦永有譽哉

十二月壬戌兵部尚書劉大夏乞休致言

先帝晚年察臣愚直傳宣顧問無月無之義則君臣恩  
父子不幸

龍馭上賓恭遇

陛下嗣登寶位兵事方殷義不忍去但犬馬之年已及七  
十若貪圖祿位訾議橫生恐傷

先帝之明願賜骸骨歸

上曰卿受知

先帝簡遺朕躬方切委任正直盡心職務可固求休退耶  
其即勉起供職勿再辭

○正德元年正月戊戌有司月給致仕工部侍郎潘禮食米三石巡撫河南右副都御史韓邦問奏禮草廬蔬食不事干請年過八十宜有所賜給以膳終身

上曰禮安貧守分風節可崇遂有是命

○三月甲辰遣行人存問致仕南京工部尚書胡拱辰賜之勅曰卿以優裕之才清慎之操敷歷中外多歷年所茂著勞蹟為時名臣既遂退閒懋修靡懈德望愈隆壽考康寧年躋九十完名盛福求諸今日蓋僅見焉朕方

孝奉

兩宮推恩臣庶爰稽尊賢養老之典特遣行人賫勅存問并賜羊酒仍令有司月加食米二石歲加人夫二名以

示優春卿其體朕至意願養天和益延壽祉表儀鄉郡  
為國之光故諭

○四月丁巳少師兼太子太師吏部尚書馬文升上疏謂  
臣歷官已五十六年年今八十有一矣自七十以來累  
疏乞休未蒙

先帝俞允今

皇上嗣登寶位豈不欲誓死圖報但藻鑑人物全藉精明  
力強健耳目聰明方克有濟而臣衰老愈甚諸疾交侵  
萬一用人未當恐來物議况今災異迭見濫居師保重  
任不能變理寅亮亦當罷去以弭災變

上曰卿歷事

聖月

上卷一

廿五

累朝勞績茂著朕當新政委任方隆乃屢求休致情詞懇切特允所請賜勅給驛以歸有司紛食米月五石役夫歲八人以示朕優禮老臣之意

○正德六年六月辛丑大學士李東陽以老疾乞休言衰老益深疾病交作且官列三孤職司輔導而神思荒落不能効謀慮之勤精誠未孚無以為感格之地伏望聖慈憫其衰病乞骸骨以盡餘生

上曰卿忠誠體國輔導

累朝功烈譽望天下共知述作議論尤為國華出處進退關係天下重輕宜體朕情亟起視事乃見君臣同德之義不必再辭

○正德七年七月癸酉大學士李東陽九載考績吏部以  
事聞

上曰東陽輔導三朝勤勞洵至勲德懋昭今以一品九年  
奏績可降勅褒諭令兼食大學士祿仍舊供事錫之誥  
命宴於禮部以稱朕優禮重臣之意

○正德九年八月戊申右副都御史彭澤既平蜀寇且還  
會陝西土魯番之變復命澤總制經畧自謂久典軍務  
又陝為鄉土乃引疾辭詔不允且曰朕亦念卿久勞於  
外宜勉為朕一行以安邊境其毋固辭

表功臣

○正德八年十二月辛亥追贈誠意伯劉基為太師諡文

成先是基九世孫指揮使瑜以贈謚及詞額請禮部議  
覆詔曰基在國初運籌帷幄功比漢之子房其賜謚如  
之額其祠曰翊運時部議併及翰林院學士承旨宋濂  
國子監祭酒宋訥亦皆賜謚濂曰文憲訥曰文恪

尚賢

○正德十年七月乙巳給事中毛憲言昌平侯楊洪都督  
山雲大學士朱善尚書王竑陳洽王恕都御史吳訥韓  
雍御史鍾同脩撰羅倫布政司使陳選勲業節義文學  
俱可錄乞賜謚立祠時洪雲訥洽恕同皆已謚禮部以  
未謚及宜立祠者請詔國家文武名臣宜示優崇未有  
詞者俱附鄉賢名宦祠令有司致祭善竑雍俱予謚其



他著名節於時褒錄未及者巡按御史詳覈以聞

○正德十一年五月戊子南京禮科給事中徐文溥言

先朝有吳興弼陳獻章者皆以大臣論薦崇以殊禮雖二  
臣雅志弗究厥用然亦足以彰

聖朝重道之意至今聞者猶足興起頃來儒道不明巧偽  
競出務為險怪罔惑人心排侮儒先招誘無耻變製巾  
服標張門戶狀如鬼怪心若穿窬世道之害至此盡矣  
竊見致仕侍郎章懋造詣精深涵養醇熟不立異以駭  
俗不矯飾以求名誠心正學庶幾乎道海內學者翕然  
宗之較之二臣奚翅不讓

皇上亦嘗擢之太常世之禮部懋雖甘老而朝廷待之不

為不優臣獨以為二臣者布衣也

先朝待之如此懋始居翰苑志節夙著逮掌國學師範益  
尊進秩常階未昭殊數豈

聖明之待耆德反布衣之不逮乎臣願舉

先朝崇儒之典倣三代養老之政或遣使存問或安車徵  
起不惟儒道增重

聖德有光且使人心知所向慕不為邪說所惑轉移風化  
莫大於此會巡按浙江御史鮮冕亦以為請吏部議覆  
上曰懋學行純正齒高望重有司可時加存問以稱朝廷  
優禮耆宿之意

褒忠節

○正德元年二月癸亥廬州府知府馬奎奏故元淮南左丞贈平章幽國公謚忠宣余闕合肥青陽里人也至正之亂提孤軍守安慶援絕城陷與妻子女俱死焉一門五節世所希有我

高皇帝嘉其忠詔建廟祀於安慶矣但臣聞古之忠臣生地所俱有祠今其里舊祠弗葺似為闕典乞令所司修復置守者賜之祠額其於風化寔非小補禮部覆議如奎奏葺合肥舊祠給旁近戶二家護視春秋令縣正行祭禮詔悉從之額其祠如謚

○正德三年三月癸亥命興化府立祠祀宋陳瓚陳文龍叔煙文龍宋咸淳狀元為同知樞密院事兼叅知政事

以廣州亂克閩廣宣撫大使開閩興化製大旗書其上  
曰生為宋臣死為宋鬼出入前導以矢無他意後林華  
以城降元文龍被執唆都等往來誘脅不為動過杭廟  
謁岳武穆大慟不食而死瓚文龍之從父也以布衣召  
募義勇三千人攻殺林華復興化獻馘於朝遂命為興  
化同知戰守備至元將攻圍日急力屈唆都執而欲降  
之罵曰吾家世忠義寧能從爾胡狗求活邪唆都大怒  
車裂以徇至是福建左叅政熊達大理寺評事徐元稔  
各疏請立祠以表其忠禮部議覆  
上曰文龍叔姪在宋季死節忠義可嘉其立祠令有司春  
秋致祭

○正德六年十二月乙巳羣盜攻破郡縣守臣多死者詔曰赤子弄兵致戕賊命吏朕甚憫之其忠節顯著者兵部查覈以聞於是贈按察司副使周憲馮傑為按察司僉事吳景王源為按察司副使知縣霍恩王佐改茅州同知郁采為光祿寺少卿都指揮同知王保等為都指揮使憲等俱廕一人為國子生有加廕改為百戶者保等子襲陞一級其餘死事者俱視此例

○正德八年七月庚寅賜唐顏杲卿真卿廟額曰二忠杲卿官常山真卿官平原即今真定德州地也前知府彭澤於學宮右建二顏祠至是成知府李堞以廟額請詔曰忠節之臣古今一也杲卿真卿以死勤事有功於唐

其賜之祠額仍令有司每歲仲春致祭

○正德九年十二月辛丑直隸南和縣故有唐相廣平郡公宋璟祠未載祀典至是知縣李希夔以請詔以璟守法持正為唐名相其令有司歲仲春致祭

○正德十年二月庚寅巡按廣東御史高公韶奏韶州故有唐相張九齡祠景泰中用給事中白瑩言以唐韶州刺史鄧文進宋邕州推官譚必國朝永豐令鄧顯俱附祠配享竊考九齡子拯為伊闕令時安祿山陷河洛拯不受偽官堅守臣節忠義著聞而獨見遺似為缺典禮部議覆詔曰如拯可謂不媿其父矣其令從此

戒諭臣下

○正德三年正月丙辰天下朝覲官司官畢辭還任賜之  
勅曰朕受

天命嗣

祖宗大業為天下生民主風夜倦倦念吏治多弊民生未  
安每因事申飭所司務遵成憲以供厥職爾等畿甸藩  
服之臣雖職分不同分地各異皆與有民事之責茲當  
述職來朝已令吏部都察院詳審甄別黜其尤不職者  
以示懲戒俾爾等仍還舊任中間廉恕公勤克舉其職  
者宜益加勵翼緒續前功間有職業不修幸免黜罰者  
亦宜改過自新用圖後效大抵司牧之官頒上遵法守  
下勤民事寓撫字於催科以刑罰弼教化隨事盡心隨

材效力俾四方小民皆安享太平之福斯稱朕承

天法

祖勵精圖治之法爾等其敬之念之故諭

戒將臣

○弘治十八年五月庚戌命太監苗達監督軍務保國公  
朱暉佩征虜將軍印充總兵官右都御史史琳提督軍  
務太監張林官理神鎗銃砲都督同知李俊都督僉事  
神英克左叅將都指揮同知陳雄都指揮僉事張澄克  
右叅將統領京營官軍往宣府征剿仍賜達暉琳勅曰  
近宣府守臣節報虜賊擁衆寇新開口等處勢甚猖獗  
爾等其相機調度分布要害設伏出奇或攻圍未解多



方救援或肆為衝突悉力拒遏或掩其未備或邀其歸路務期克捷毋坐守一城聽其虜掠毋率意輕進墮其姦謀宣府大同偏頭關及延綏等處遊竒等兵俱聽調用叅將而下及各鎮巡等官悉聽節制官軍頭目人等敢有違犯號令者重以軍法處治其臨陣退縮不用命者指揮以下就於軍前斬首示衆然後奏聞斬獲賊級俱送紀功官處審驗從實開報以憑陞賞不許冒濫軍中事有難拘常例者聽爾等便宜處置爾等受茲重託宜竭忠効力以紓朕比顧之憂其徃欽哉

明武宗實訓 卷一

四一

大明武宗設皇帝實訓卷之一終

大明武宗毅皇帝寶訓卷之二

光祿大夫柱國少傅兼太子太傅禮部尚書武英殿大學士臣呂本謹校

南京禮部祠祭清吏司郎中臣陳淙

南京兵部職方清吏司書事臣朱錦謹閱

南京工部虞衡清吏司郎中臣呂鳳昌

嚴考察

○正德八年三月己丑吏部言諸司職掌內外官考察黜陟及憲綱內御史巡歷糾劾有司各有定制劉瑾乃創為不時考察之例近給事中王萱等各因流賊災異進言奉旨令將內外官訪察糾黜此固專為有賊地方非通例也各撫按及奉差科道等官乃循以為制劾奏太

上行二卷

頃今去朝觀甚邇若使一際行則是每歲皆朝觀之  
年在處行考察之典而舊制反為虛設矣且人才難得  
將責其成尤須久任亟黜亟補廢事愈多請命都察院  
轉行各御史等官除事干軍情者許劾其餘悉照憲綱  
則事有定體人有固志矣

禁貪

上曰內外官考察如舊制行之仍諭撫按官一體遵守

○正德十年六月己巳詔內外問刑衙門凡徵收部解官  
物雖未入官有所侵盜及遇革不改者俱照監守及侵  
盜倉庫例科斷敢有故縱者坐之著為例

去冗

弘治十八年八月戊寅先是吏部奉詔查得陞乞陞冗官太僕寺卿李綸等七百六十三員請裁革并戶兵等部因事添設官員亦宜酌量繁簡以為去留得旨添設官員其會各堂上官議之陞乞陞官有黜者十七員三四品者降三級五品六品者降二級七品以下者減半俸辦事其餘俱革之內有職事者與冠帶閒住匠役月支米一石供事今後凡有仍前夤緣傳乞者科道并諸司指實奏聞

○正德六年十二月乙巳總督南京糧儲右副都御史丁鳳奏南京內外各衙門工匠廚役醫士醫生凡七千八百七十餘人月應支糧二千三百九十石有奇請裁革詔

冒濫當革姑斟酌處置內官監人匠劉瑾新收者俱改  
正司禮等各監局人匠支米三斗者仍舊四斗者減一  
斗太常光祿寺廚役各減其支米二斗醫士醫生革之  
抑迎習

○弘治十八年六月乙亥兵部奏湖廣均州太監齊玄原  
非額設近又改為鎮守復增於舊而西北沿邊凡有兵  
馬處皆添設監鎗分守守備內臣此邊方之極弊也乞  
悉遵詔旨取回一應邊事責之鎮巡等官庶少紓邊方  
之困得旨齊玄既非額設取回京其餘應裁減者仍通  
查議以聞

○丙子兵部言皇城四門以拱護宸居京城九門以護

奸究通來門官太多科占軍士逼致逃亡門禁漸弛其流弊有不可言者請遵詔旨凡非舊額一切裁革

上命皇城四門仍舊其餘各門自今以內自為則不許增著為令

○十二月乙丑五府九卿科道等官合奏各馬牛等房逐年虛增頭匹不下數十千濫支料草不下數十萬

先帝深知其弊著為令典每年一次勅科道官查點以憑會計自是歲派料草計尚銀二十七萬四千餘兩今

陛下乃因御馬監太監楊俊寺資緣具奏但令俊等查數會計科道等官停止勿差此端一開百弊復作徵求益

濫其為新政之累夫豈小可願體

先帝圖治之急仍令巡視草場科道官如原旨查點實後  
等於法以為後戒

上曰卿等所言良是查點會計仍遵

先帝旨而行俊等肆為欺蔽法當速問姑宥之

○正德六年十二月辛丑戶部覆孫禎等所言節財用禁

科害二事得旨各倉庫及門官累有禁約全不遵守今

天災地震軍民困苦正修省構節之時本當黜革姑免

查究該部其以舊制申論之如蹈前弊聽科道糾劾并

許被害者陳告坐以重舉人後添設多餘官負不必補

如有夤緣投託者司禮監等治冗負冗役所司備查以聞

重恩廕



○正德元年正月甲辰故南京工部尚書董越妻溫氏奏  
謂臣夫嘗侍

先帝講讀於東宮者三年乞念舊學之勞如例錄臣孫韓  
為中書舍人事下吏部看詳言越講讀年勞頗淺可如  
侍讀學士江朝宗之子寧例送國子監讀書有旨令再  
查朝宗講讀年勞蓋朝宗侍東宮甫踰年與越殊

上曰廢子乃東宮講讀恩典越講讀既三年韓准送中書  
舍人習字出身其未及三十年者如寧例

○五月壬辰錄故禮部左侍郎兼翰林院學士薛瑄孫葵  
於中書舍人習字出身初葵授大學士李賢商輅徐傳  
例以請吏部言賢等官至如瑄止亞卿加恩似宜有

皇明實訓 正德二卷

差但瑄負德望嘗入內閣亦著勞勤身後未嘗廢叙惟

上裁

上曰延賞世祿皆帝王盛德仁政也况瑄名臣廢敘宜厚

其許之

厚親

○弘治十八年六月癸亥

上以初即位賜親王白金又綺各有差仍貽諸王書曰奉

皇考遺命縉紳鴻圖念亦至至親劾勞藩屏有年特具白

金文綺用表親親之意於亮之

○八月戊辰初雍王奏衛地卑濕寢宮殿宇朽蛀滲漏

不可居又夢寐不安時以怪異乞移山東平州

先帝遣內使齎書諭慰屢集廷議以擇地別建勞民傷財  
但宜督工修理至是王復上奏詞甚懇切

上仍下廷臣議以四川叙州見有申王空府蓋造新完宜  
徙居之詔可既而王不欲遷乞仍修本府

上曰王屢奏必不得已朕重遣其情乃遣太監梁文工部  
郎中張謚往修之

○正德元年四月辛亥兵部奏兩京錦衣衛等官旗全由  
傳乞應革者王漢等十一人由恩應革者由功應存者  
陳祿等八人由乞陞遇例未盡革今應盡革者黃灝等  
二十七人總小旗由乞而充今應革役者徐昂等五人  
由他衛傳調錦衣衛今應還衛者陶琦等二人請加詔

處分其南京錦衣衛千戶尹果百戶尹德尹隆乃含山大長公主曾孫去留惟命

上曰果等三人朕念大長公主故特留之餘從所奏

○十月庚午榮王奏弘治十六年六月內奉

先帝命將之國而未行隨侍官校已一載先行其衣與食皆仰給於臣而臣在京祿未止三千石無以給之乞歲加二千石庶可供兩地之費戶部執奏

上曰朕念王窘於用特加千石俱本色以慰其意

○正德二年五月癸丑河南守臣奏各處王府鎮國將軍以下房價俱官給惟河南將軍府蓋造率用已費未經定擬章下工部會議謂勢同事異誠有不均若槩與之

又恐民勞財傷難于經久今自正德三年正月以後凡將軍授封出關者按李類奏每鎮國給銀二百四十兩輔國視鎮國六分去一奉國視輔國五分去一中尉視奉國四分去一俱布政司給與自行修蓋

上曰宗室日繁房屋宜有等殺庶幾恩可溥施而財力不  
屈也其著為令

○正德三年五月辛酉榮王奏長子次子未  
乞賜頒給

上曰朕念親親之誼固欲從厚但稽之

祖訓祿米自有定制豈敢有違已別有頒賜矣戶部其移  
文長史司啓王知之

○六月己巳益王乞每歲自遣官詣金山口祭掃生母德妃張氏墓禮部議非舊制

上曰遣官祭母王之誠孝至矣但朝廷歲時自有祭祀其已之還以書復王

○正德十年三月辛未寘鐸之敗也以其孫彙材托僧大千者與俱亡卽以家人子冒名彙材就繫彙材時年十七削髮走河南永寧之千山窈庵居焉更名正奉未幾大千死彙材為土僧所凌復走故縣鎮寓三官廟久之彙材憤懣不勝遂自詣官言狀乃送之慶府王厚遇之與鎮巡官皆以狀聞尋傳致京師寘鐸府中舊人在浣衣局者已不能辨識法司會多官審訊彙材抗言曰我

高皇帝七代孫義不辱於齊民歸命

君上於是

上令鼎材雖在不宥之列既束身歸命姑從輕送鳳陽高  
牆安置仍以書諭諸王知之

正宗藩

○正德四年十二月庚戌禮部奉旨檢詳

累朝政令凡涉王府者條列上請一舊制各王府生子女  
三日即具奏其奏報冊歲一上玉牒冊三歲一上近多  
違期及不開庶生子女所出者於其請名請封選婚日  
治長史等官罪一親王嫡長以下郡王嫡長子孫俱年  
十歲即請封其餘子孫十五方請內府監局成造冊印

皇明通志

卷一百一十五

諸物當以奉之先後為序各府關領人役有歸或後期及詭稱使費者謫戍邊又各王府儀賓例賜鞍馬守僕之難飼養之費得不償失自今惟親郡王儀賓照例關領餘皆革之一

祖訓止著嫡長襲封之文其後有以庶弟襲封如保安王者以嫡姪襲封如交城王者以庶堂姪襲封如永興王者俱出特恩近應山王絕嗣嫡姪請繼伯王爵臨潼王進封秦王庶伯請補姪王爵者惟命以鎮國輔國本職奉祀已著為令自今郡王沒無嗣及進封親王有如應山臨潼者其宗支正許奏請奉祀一各府以罪革爵重者不復輕者革未幾復之自今有罪重者不許引輕例



冒請一親王郡王病及薨其子幼則以親支暫理府事  
請勅諭暫理者善撫幼子無令失所俟其長即回本府  
不得復預諸事一王與正妃年五十無嫡子始立庶長  
子為王世子郡王年老正妃已沒無出乞封庶子為長  
子者請自

上裁一各王府將軍而下薨故無嗣者止許以昭穆相應  
者承祀不得違例奏乞繼嗣名目一親王朝覲雖載

祖訓

英廟之時亦嘗一舉然久已不行以故比者崇王請朝則  
貽書免之今後凡親郡王請身自入朝者並免著為令  
一凡親王之國無迎養生母之禮近岐王有請雖懇切而

祖宗之制不可違其餘各府宗室沒侍妾無子者例移居別宮有子處外者各從其子迎養若生子多者亦止就一人一近例親郡王妃并將軍夫人沒而無出者許選繼室有出者止選內助自今妃夫人沒不欲選娶繼室內助者許於宮人中擇其可者奏請管理家事不許溺愛濫請一各府宮眷有嫉妬亂倫爭競越禮詔革封號者不許妄請復本府官有為之請者本部劾治一先是藩府鎮國將軍詮鏊侍女既娠為嫡所妬出寓他室生有子匿不以聞嫡沒又選繼室請封事覺乃削今後有此類者許親郡王及輔導官奏聞區處母致生育不明閨門貼玷一凡王府婚禮奏選有制若未娶正室而侍

女先有生育者輔導官舉奏區處所生子女不得請名請封著為令輔導官匿不以聞坐之一各王府襲封之初其先王宮人有出者留府養贍無出者放之將軍以下并庶人沒者其宮人無出亦令歸其親屬嫁遣違者鎮巡官具實參奏有撥置阻撓者重治之一各府承奉等官

祖訓載有額設名數郡王內使二名亦奏准之例員缺則保陞數少則撥補不許額外濫保及擅立六典膳名色以圖保陞已著為令今後有違者罪坐營求之人及輔導官一先是革爵庶人鍾鏞嘗進琴詔不納降勅切責自今有庶人越分進貢者本部奏參區處一各王府進

獻土物本出尊親之誠今後若進筭進扇之類宜令本  
府自備脚力免驛遞應付以蘇民困一永樂中有旨凡  
使人至王府止欵以飲食不得賞物今宜申明凡使人  
至府有需索財物者許巡按御史按察司叅究一先是  
各府有守節及貞烈者具奏旌表今王室繁衍宜通行  
昭示以為世勸一天下王府有無籍之徒假以燒丹煉  
藥為名往來誑惑者鎮巡預為禁約一各府所遣人除  
關領者勿限餘俱嚴限遣歸如在途延緩及潛住於京  
有所營求者照例叅究一王府凡遇疾病喪葬修齋設  
醮一切禁革至於僧尼道士女冠巫祝之流尤宜痛絕  
勿容出入違者許撫按官擒治併追究誘引之人罪之

一寺觀廟宇徒耗民財無益於事自今各府不許修建  
并請額

上批荅曰諸事既議處諦審凡

累朝舊制及見行例其中明禁約郡王將軍而下卒無嗣  
及郡王進封親王者其宗支正許奏請奉祀不得營求  
請封繼嗣名目親郡王生母授封者從簡葬祭各王府  
勿容僧尼女冠出入宮禁及私建寺觀違者承奉長吏  
以下俱罪不宥餘皆如議仍諭諸鎮巡官知之

○正德八年九月丁亥魯府鄒平王陽鎔子當涼既革王  
爵猶與當濕爭襲奏訴不已復命司禮太監賴義刑部  
侍郎黃珂錦衣指揮陸宣往勘還奏當濕當涼皆庶子

而當濕為長禮部尚書費宏等前議以當濕襲封革當  
涼封號其事已明法已正矣而當涼爭猶未已者由其  
父陽鏞徇私溺愛為其母子請封魯王陽鏞亦依違為  
之代奏而先任禮部尚書周洪謨倪岳等皆為所惑不  
能據禮以折之皆使得冒長云繼妃之封已二十餘年  
故當涼得籍以為辭郡下包慶等利其復立實從吏之  
請置慶等于法逮問長史審理紀善以下魯王及洪謨  
岳等已物故者惟

上裁之詔當涼累疏強辯有違

祖訓當重治姑從輕令以齊民巾服習禮滿三載以聞仍  
奪其母原封金冊魯王既引咎舉正停祿兩月洪謨岳

己故者宥之長史審理紀善以下俱建治誦慶等五人  
成邊

○正德九年八月壬寅先是鄭康王祐杓薨無嗣詔以其  
從弟祐樾襲封為鄭王景門王之孫而東垣端惠王之  
子也鄭王嘗為其父奏請追封入廟凡三上疏禮部屢  
覆鄭王以旁支入繼親王不得顧其私親詔如議至是  
復以為請下禮部議以鄭王懇疏雖出於孝然非以禮  
事其親者執議如初詔曰旣於禮有悖其己之

褒諭宗室

○弘治十八年九月癸巳韓王奏襄陵王徵鈐讀書予禮  
篤於孝親割股愈母疾父莊穆王薨核木供奉如生忌

日必哀時新不薦不敢食侍弟鎮國將軍範堦友愛尤  
篤凋軍校貧乏葬其不能舉者若干年七十七猶扶筇  
北向拜

聖壽等節不肯廢禮請褒崇之以式宗藩

上乃致書獎諭曰敬問高叔祖襄陵王年高德盛孝義彰  
聞朕不勝嘉悅夫宗室者天下之表率有此善行宜用  
表揚尚益懋初心允終令德俾諸後進有所觀法同歸  
於善庶於藩輔有光焉

○十二月乙亥魯王奏鉅野王府鎮國將軍陽銖陽鑿少  
喪父即知哀慕觸地流血長能事母倍甘旨謹醫藥有  
疾慚以身代比沒哀毀塋祭咸與禮合茲年近六十言



及猶哽涕又兄弟友愛篤至山東旱饑嘗疏減常祿以助賑卹乞賜坊名以褒揚之

上曰宗室中有賢行如此朕甚嘉之其賜坊名曰彰善嘉義俾宗室有所勸焉

○正德元年二月己未陽曲王府輔國將軍奇渾榮請王之孫故鎮國將軍鍾鏐第六子也少失父事母丁氏至孝母嘗病朝夕侍湯藥水漿不入口者四日憂悴骨立居常積書千卷與士大夫講習清談如寒士每冬出粟五十石以賑饑有司上其事

先帝命覈實至是以聞

上乃賜書獎諭曰惟國家以孝治天下凡臣民有孝行者

上皇明實訓 正德二卷

十二

必命有司旌表以勵風俗况宗室乎爾孝行純篤是用致書褒獎且以風動諸藩爾其欽承之

○正德四年三月己未壘書褒獎東阿王及其女臨城縣主凡縣主出閣例給房屋價銀而臨城縣主獨不願領工部覆議謂其心存廉潔事異尋常宜加褒獎以勵宗室上乃貽書魯王曰禮讓為國之美事東阿王及其女固辭房價雖於國用無大損益然禮讓風行始自宗室其於化理關繫匪輕用是致書褒獎其俾欽承之

○正德十年閏四月庚申降勅獎諭韓府鎮國將軍範楷曰近韓府王奏爾事父莊穆王及母謝氏至孝莊穆存日嘗書孝行二字及自製詩文以美爾與兄恭惠王相

友愛年已八十過父母忌日猶哀慕又工詩善畫每讀  
古人嘉言善行則再三誦之欲使子孫各勉於為善王  
之言云爾朕聞而嘉之特降勅獎勵以為爾榮且以風  
示諸藩焉

戒宗室

○弘治十八年十二月乙丑晉府慶成王南海郡君儀賓  
李實以包攬銀糧獲罪郡君私入京擊鼓訟寃禮部遣  
中使送回仍勅王約束并治教授守城等官罪

上以郡君出城訴訟有乖禮法命會法司議會慶成王亦  
奏郡君及將軍奇滔奇浙表枕表糧表梗表搨諸不法  
於是禮部會法司議請申明禁令凡越例私奏者俱寢

其事

上曰將軍中尉及郡縣主君等多入京奏訴近已成風騷擾道路貽辱宗室其即移文各王府省諭禁約敢有仍前故違者併治之

○正德元年正月庚子榮王陳乞霸州信安鎮莊田蓋牧馬草場地也戶部言永樂間設立草場蕃育馬匹以資武備至成化中近幸始陳乞該鎮草場為莊以後岐壽二府相沿管業莫之改正暨

孝宗皇帝留神戎務差官清理特勅退還此不以私恩廢公義也今榮王之國有期其所乞宜勿與

上乃諭王曰此

先帝意也已之

○七月戊子德王奏莊田在宛州等處者畝徵子粒二斗惟清河縣子粒成化七年用少卿宋旻議以為畿內役重民貧畝止五斗近又奉詔例凡莊田畝止徵銀三分臣將無以自給乞如舊徵二斗有旨遵從之戶部復言稅重民不堪故多逋負今山東境內水旱相仍百姓凋敝意外之虞不可不慮宜如詔旨起科便

上曰朕不知也且王何患貧其勿許

○正德三年十二月庚寅慶成王奏姪奉國將軍表標先聘典仗所餘丁田林女以祖喪未婚至是服闋疏請

上曰王府子女禁於本府軍校之家選配奈何遠之其別

月書川

正德二年

十四

行選配後有違者禮部查出停婚被選之家成邊衛不貸  
○正德四年正月丁巳初榮王之國所過騷擾事聞乃降  
勅戒諭之曰王已莅封國殊慰遠懷但聞在途時綁縛  
官吏需索財物夾帶私鹽沮滯客商所至嗟怨多逃避  
者王深居少出豈能周知必有主使撥置之人而承奉  
長史等恣肆無忌不能禁戢貽累於王似非細故王宜  
深自脩省正己律下毋俾府中官屬及軍校生事啓釁  
仍追究在途撥置者具奏處治王其益敦敬慎永保祿  
位顧不美歟

○正德五年八月戊戌降勅切責慶王台宏革其護衛并  
祿米三之一太監張永還奏王屈身冥謫行名臣禮員

皇上展親之仁失諸侯維藩之義其郡王以下及承奉長史俱宜罪禮部覆奏命會勳戚文武大臣議入

上曰召汝當實鑪反叛之時朝廷意其必不通謀及奏為真鑪阻截已累有勅旨慰勞今乃委身從叛國典難容卿等既會議明白本當削爵姑從輕革祿米三之一隆勅切責郡王以下皆免宥承奉長史等官執赴鎮撫司考訊中護衛單為寧夏中屯衛隸陝西都司仍諭各王府今後不許與文武官交結及誘引邪說之人在王府出入違者聽鎮巡官指實糾舉

○十二月庚寅禮部會府部等衙門議朝廷宗室各有爵職其品第之高卑視支派之疏戚故爵封之典載於

祖訓惟親王之子不分嫡庶郡王言嫡而不言庶者

祖宗立法之意固有在也其後郡王無嫡者亦得襲封至於兄終弟及係出一時特恩宗室之中援此為例故凡族屬踈遠者妄圖承襲累煩廷議以致逆瑾得以假借納賂變成法示私恩而秉樞秉檄誠激例不該襲皆許襲封至以敗倫傷化革爵如鍾鏗者亦復原爵今已奉旨改正後各藩襲封親王郡王俱以嫡繼無嫡以庶如果無庶許應奉祀者以本職奉祀其諸弟姪不得遠引祖父先爵為詞及不許親屬撥置徑行奏請如有仍前朦朧奏擾者奏詞宜格不行賈奏人治罪內外輔導官叅奏究治庶宗派明而法制定矣議上詔以封爵重事



自今郡王無庶子許次及者以原職奉祀不許弟姪冒請封襲有朦朧奏擾者內外輔導官治罪保安王誠激永興王秉檠皆應查革業已有成命姑仍舊封以後子孫并已故邵陽王秉檠子孫悉如議鍾鎬戮傷倫埋情罪深重仍革爵降為庶人

○正德十一年三月庚子代府鎮國將軍聰泚輔國將軍聰覲泚泊嘗出邊城奪人財物為代王所奏已革祿米三之一至是王又奏其交狎群小為惡滋甚下撫按官勘實刑部議覆詔聰泚聰覲泚泊屢違

祖訓法當重治但念宗支姑從輕泚覲再革祿米之半泊三之一以示懲仍賜代王書命戒約之郡小坐死者二

皇明實錄 卷二

人請戍者八人

討叛

○正德五年四月辛丑以竇鐸反赦天下詔曰自古帝王法天立政布德明刑不可偏廢朕嗣位以來仰荷

上天

祖宗付託之重勵精圖治越五六年念惟世久承平人多玩法振起綱維剷革姦弊期與斯人登於至理而有司不能悉體朕心奉行過當虛懷徒切和氣弗臻乃自今春以來亢旱為厲時雨愆期風霾屢作星異迭見四川湖廣等處寇盜縱橫撫捕未定而陝西寧夏都指揮何錦等戕害守臣拒殺官兵屠戮居人謀立安化王寘鐸

為主出給印信票帖招誘諸路索要軍馬地圖各鎮官  
員連日奏報具有實跡爰下皇親廷臣會議僉謂宜鑄  
悖逆

天道得罪

祖宗朕不敢赦祇告

太廟革其封爵削其屬籍命將出師正名討罪誅剿首惡  
分釋脅從撫定軍民安靖邊境尤念兵戎事重供億甚  
勞加以逋負相仍徵科未息在在皆然方欲省刑薄斂  
任賢使能培養元氣掃除災孽以保我國家億萬年之  
祚所有寬郵事宜條列于後於戲用兵者如不得已用  
刑者必求其生方興問罪之師大古一之政播告中

外戚使聞知

○正德十四年五月庚戌太監韋霽傳旨各王府人奏事京邸及慶賀進貢留者多不過月餘近乃不循舊規或留數月或半年一年亦有久留不去者其意安在自今以後所司趣令事完即回不許久留邸舍違者緝事衙門指實具奏治罪不宥時寧府內使及校卒潛住京邸者常數輩逆謀頗泄故下此令

○七月戊申詔諭兵部曰宸濠大逆不道神人共怒都御史孫燧副使許逵等守死不屈忠義可尚南京守臣盡心區畫協力防守南直隸湖廣山東河南各鎮巡等官或調兵把截或先事預防安慶守備知府及江西各邸

縣官或逼其先鋒或聞警設備皆推誠體國以討賊為  
急朕心嘉悅其即移文令各相機戰守務保無虞尤宜  
撫卹貧窮安固邦本待事寧之日令各巡按御史具實  
陳奏死節陣亡及運謀設策保城殺賊有功者俱旌表  
褒贈陞賞其懷奸不忠退縮債事者從重治罪

○丁巳以宸濠反削其封爵屬籍詔告天下詔曰惟我  
祖宗列聖開創洪業封建親藩所以拱衛國家奠安  
宗社朕以菲德嗣承大統恪遵

祖訓醇厚親親天地神明所共臨鑒豈意寧王宸濠天性  
兇惡自作不靖誣陷郡王淫亂宗女打死無罪平人不  
下千數強奪官民田產動以萬計脅奏良善毒害忠貞

聚集郡盜招納叛亡私造戰船擅置軍器造謀作孽積  
有歲年流言日聞朕未遽信前年本府內官赴京告變  
近日在京科道交童舉發朕猶念在親誼曲為保全特  
遣親臣賚書戒諭宸濠自知罪在不赦使者未及半途  
先已肆行反逆殺害巡撫囚禁守臣分遣賊徒四散流  
劫占據官府縱放囚獄攻圍城池燒燬郡縣搜劫印信  
搶奪運船南京各處守臣連日飛章奏報具有實跡反  
狀甚明爰下大廷會官集議僉謂宸濠悖逆

天道得罪

祖宗古今大惡朕不敢赦祇告

天地

宗廟革其封爵削其屬籍親統六師正名討罪除首惡宸  
濠及同謀有名逆賊不赦外其餘脅從之徒盡行寬釋  
占奪田地悉還本主本處并經過人員近因迫脅拘繫  
妻子禁錮者即與釋放護衛及軍民職官先因陳奏宸  
濠非罪謫降者查奏起用死者贈官生者優卹上以慰  
列聖在天之靈下以救一方塗炭之苦兵出有名事非得  
已內外大小之臣遠近忠義之士同心合志協力效謀  
旬日之間罪人可得尤念匹夫作難毒我良民惡聲傳  
聞玷我宗室重以師徒所過閭井騷然供饋之繁衆庶  
勞止疾苦在下憂切朕心俟大功之告成將大賚於海  
宇嗚呼奉

天討罪大義不私於所親和衆安民至仁無敵於天下故  
茲詔示咸使聞知

諭江西城中并附近地方官員軍民人等曰惟爾衆悉我  
祖宗列聖之遺民平日服事朝廷皆為良善今反者宸濠  
一人非爾衆罪間有被其迫誘不得已從之者朕已悉  
知之今天兵征討誠恐鋒鏑之下玉石不分有傷爾生  
害及爾父母妻子其有能去逆效順者俱宥之若終不  
改悔事定之日全家處死中有糾聚義兵擒殺逆賊者  
量功之大小封拜侯伯及陞授都指揮指揮千百戶等  
官世世承襲賊黨內有能自相擒斬首官者與免本罪  
仍一體陞賞其轉相口諭俾知朕意



○八月庚寅禮部會廷臣議上居守事宜詔居守如南京  
內外守備例司禮監內閣內外坐營官府部等衙門及  
六科東廠錦衣衛各賜之勅旣而勅諭司禮監太監蕭  
敬等曰朕今親統六師奉行

天討剿除叛逆以安

宗社尚念根本重大居守無人特命爾等照依舊規慎重  
行事皇城并京城門禁鎖鑰及內府大小衙門 行事  
件爾等提督各該職掌人員用心管理毋致疎虞其每  
日題奏本惟陞授文武大臣并緊關重大事情待奏請  
旨其餘俱照依府部等衙門原奏覆奏事理發下內閣  
從長議處擬旨發外施行毋致遲滯每月仍一次屢奏

三月

卷二

以聞其各衙門奏軍機緊急重務一面發下議處一面  
星馳具奏該用錢糧軍馬等項令各該衙門整辦應用  
毋得違誤爾等受茲委任尤須協和內外周悉計慮不  
許徇私執物以致妨害政體貽患軍民如違責有所歸  
爾等其欽承之又勅大學士楊廷和等曰朕今親統六  
師奉行

天討剷除叛逆以安

宗社尚念根本重大居守無人一應令行事務恐致廢弛  
特命爾等照依內閣舊規同寅協恭勤慎供事每日司  
禮監發下在京在外各衙門題奏本俱要一一用心看  
詳擬旨封進奏請施行其奏有軍機緊急重大事情該

用軍馬錢糧器械關防符驗之類尤要詳加審處擬旨封進聽司禮監一面奏聞定奪一面發衙門依從議處毋致遲滯誤事爾等受茲重託尤須盡心竭力維持公道不許徇私執拗致妨政體貽患軍民如違責有所歸又勅五府六部等衙門會昌侯孫銘尚書陸完等曰爾等宜同寅協恭盡心職業以安輯士衆保衛京師用紓朕內顧之憂事有應與各衙門計議者公同議處停當而行不許偏私執拗有誤事機

○已已傳旨六師南征本以伐叛安民不宜秋毫有擾內外大小官軍人等所歷之地凡蕩粟舟車什物已命官經理不之朕念軍民艱苦正收穫之期慮官軍罔遵法

度騷擾所過其各領兵太監總兵提督侍郎坐營等官  
各宜嚴戢所部申明軍法不得生事擾人如有違例占  
用及乘機搶奪軍民商販行李車船牲畜踐傷禾稼剪  
伐樹木毀壞室廬科索財物勒買市貨酒脯倚強凌弱  
者聽被害之人指實赴訴隨輕重治罪兵部其目才榜  
通行津道軍衛有司曉諭禁約遵守

○乙酉傳旨諭南京內外守備叅贊等官黃偉等今江西  
反賊宸濠偽傳檄榜鄱陽縣官宜即毀之何乃敢與轉  
遠張彼訛謗搖動人心爾等不行究治亦輒輕易奏入  
甚昧大體其即移文江西及鄰省大小衙門今後宸濠  
片紙隻字不許轉遞即行焚燬擒其持檄者如律治罪

違者不貸

○弘治十八年八月戊午署承運庫事太監龍綬言近日戶部會官議欲節財裕民內及近侍官設為修建買辦成造等名盜取庫銀以致經費不給是誠有之乞勅司禮監會同內閣府部科道官通查內府諸監局傳取金銀其非有印信題本者務見所造何物所買何物詳具實數造冊備照有餘責令還官自後有仍前泛濫傳取者聽本庫會同司禮監指實奏請究治庶可杜絕時弊又聖誕等節所賞銀有一人多或至一二百兩者親王并公主郡主王妃千秋節令之賜亦倍徃年此類既非勸功之典實開蠹財之源宜量其事之大小以為賞之輕重

俾等分有常給賞有序亦初政防微杜漸之急務也綏  
又言近年所出倍於所入今

聖誕千秋冊封給賞所用事節頗繁請勅戶部計議每歲  
應進金銀若干可足國用其有非軍國所急需之財可  
供修建及齋醮者聽特於該部支取庶緩急有儲不至  
告乏章下尚書韓文言此庫設在內庭素無稽考是以  
出入之數外臣不得與聞傳取之用典守莫能裁過官  
如綏言一一查究其合用進庫銀兩俟諸處輸納至日  
以漸運送專備軍官折俸及封冊成造支用有仍以齋  
醮等事盡惑

聖聰浪費財物者本庫歲終開奏聽該科并本部奏問如

律凡內府賞賜一遵

祖宗舊制崇儉戒侈

上是之且曰傳取之數司禮監備查以聞

○癸亥戶部覆給事中張維新御史弓元所奏節財裕民事宜請議處得旨一應節財事宜各衙門查議以聞既而禮部言塔像齋醮蠹財宜革

上是之曰塔像齋醮何益於事其即已之惟春祈秋報如故○正德元年十月甲寅署內承庫運庫事太監秦文奏內府財用不充事務繁劇適遇大喪即位之禮相繼舉行費已不貲近日舉行大婚禮戶部僅送銀三十萬兩用之六禮用之鋪宮用之賞賜及內官監造粧奩御用監

造寶冊銀作局造儀仗諸類通計費金八千五百二十餘兩銀五十三萬三千八百四十餘兩是進入者少而費出者多將來何以應之况

聖誕千秋節所用乘輿服御所用諸王府冊封所用皆不可缺而官軍折俸每季該銀十萬餘兩春季未給而夏秋又至矣其將何所取辦哉

上覽其奏乃命集廷臣議處以聞戶部臣言財貨之在天下如水行地中其源不濬其流必竭若不能節儉用度無經而欲講求足國之道良亦艱矣今以歲入正數言之夏稅秋糧馬草鹽課折銀及雲南開辦各鈔關船料銀兩通計僅一百五十餘萬兩以歲出正數言之



等六鎮年例三十四萬兩進庫給軍官俸糧共三十三萬五千餘兩至於內府承成造寶冊之類其數不得與知大約并前折俸不下五十萬餘兩然入每虧於原額而出乃過於常數姑以弘治十八年五月以後言之諸邊年例之外添送銀二百七十七萬四千餘兩給賞征進京軍六萬九千六百餘兩給過鹽米商人二十五萬餘兩賞在京官軍七十二萬四千二百餘兩各邊官軍六十九萬三千三百餘兩陝西賑濟二十萬兩密雲居庸紫荆倒馬等關召買糧草共一十八萬八千餘兩大婚禮取四十萬兩買金送內庫二萬六千五百餘兩通前年例實用六百二十五萬餘兩又四川進金四千兩

視舊規例歲用之外至加至五六倍矣欲望財用之足  
帑藏之充豈可得哉伏望

皇上憫生民財力之艱躬行節儉毋事虛文今後成造非  
乘輿器物及各王府寶冊不得用金非

聖誕千秋令節不得用銀凡遊戲燕樂鷹犬玩好無益之  
費無名之賞一切罷止仍嚴諭該庫之莅事者歲進銀  
非軍官折俸及成造儀仗粧奩一毫不許妄支其歲入  
五十萬兩之外一分不許妄取務敦儉約以圖經久議入  
上曰節以制度不傷財不害民此聖人明訓理財之大道  
也今財用匱乏百姓艱難朕自當力加節儉量入為出  
管庫人員於每歲出入之數尤宜謹於閑防不許濫費

妄支

勵俗

○弘治十八年八月辛巳都察院覆議給事中周璽所奏  
言中外臣庶之家奢靡相尚僭用不經乞

皇上躬行節儉痛抑奢華凡日用常例之外悉從省約則  
薄俗可革淳風自還

上曰風俗侈靡日甚一日此非治世所宜有也其即通行  
榜諭官民人等宜遵禁例如有仍前奢僭者罪不宥

○正德元年六月辛酉先是有旨民間男女服飾并諸奢  
僭事禁未盡者禮部仍會都察院備查議處以聞於是  
尚書張昇都御史張敷等上十三事一舊例庶民居舍

不得過三間五架及用斗拱彩繪近來務為高大且過粉飾除已造不動自今仍違式者罪之官毀入官一舊制庶民男女衣服不許僭用金繡首飾耳環各用金一事近來愈加僭侈自今遵永樂間例軍民僧道常服禁用紵絲綾羅紗錦絲繡婦女衣服帳幔禁用渾金首飾錫釧禁用寶石娼妓禁用金首飾銀鐲釧違者罪其家長并製造工匠一民間範銅為佛像貨鬻取利僧道化緣造佛俱鍍金及軍民器物僭用銷金泥金餞金以故耗金甚多而其價翔貴亦宜并禁違者俱重罪一成化間例冠婚之家酒席從儉近歲過豐暴殄天物自今臣民一切燕會毋得用糖纏餅餛簇盤插花粘果及鋪造

造者俱重罪一近來民間婚嫁競為豐盛帳幔被褥僭  
用大紅銷金器用金銀線此貧乏之宜加嚴禁違者重治  
一近年京城軍民之家喪事甚違禮制初喪扮戲唱詞  
名為伴喪及出殯剪製紗羅人物幡幢之類排列塞途  
兼用鼓樂戲舞導送及墓陳設葷酒飲啖至醉又有揚  
幢設壇修齋追薦糜費銀物不可勝紀宜并禁革違者  
喪主親賓僧道人等各治以罪一天下寺觀庵廟舊額  
外不許私創飾以金碧違者罪如律仍拆毀入官一古  
禮士不衣狐白况凡民乎今後高販吏僕婦女娼優皆  
不許輒服貂裘一馬之鞍轡品級高下有等今後高販  
更卒軍匠僕從道人等不許僭用盛飾橫行市陌一舊

正德二卷

二六

例兩京文職四品以下及五府等管事并內外鎮守守備公侯伯都督不分老少皆不許乘轎自余軍職若上馬用交牀出入擡小轎者罪之宜申其禁其武職有用杙上馬者尤宜禁之一舊例皇親族屬姻黨家人往來河道吹響器張旌號需索人夫酒食車船者除真犯死罪外徒罪以上俱於所犯地方枷號一月發邊衛充軍若被害之人赴所在官司告訴不即受理問斷舉奏者各治以罪一軍民婦女近來用珠結蓋額謬稱纓絡或綴衣緣履官員之家結成補子甚違法制自今敢有犯者罪坐其夫違禁之物入官一舊制官民禁用金酒爵凡金銀磁碗等器禁用龍鳳紋其椅桌木器之類禁用

硃紅金飾近雖軍民之家輒踰分僭用今後一遵定制  
軍民之家惟酒盞用銀壺尊器及髹漆器用硃紅用金  
飾者治罪

上曰近來風俗奢僭漸不可長其即出榜申禁仍有故違  
者所司緝捕究治違式房屋之損敝前犯者令改正否  
者並治之不宥

○正德十二年八月庚申命立祠祀烈女何氏何氏泗州  
人年十六其父母鬻之倡家有欲犯之者何不可乃自  
刎而死提學御史黃如金請為立祠詔嘉其貞烈可為  
風俗勸特許之

正祀典

弘治十八年十一月庚寅大學士劉健等言今月十七日冬至節靈濟宮祭金闕真君玉闕真君奉旨遣尚書李東陽行禮臣等竊有愚悃謹昧死為

陛下陳之佛老二教聖王所必禁儒者所不談中世以來正道不明人心久溺如秦始皇宋徽宗好僂漢楚王英梁武帝好佛唐憲宗僂佛俱好求福未得皆以得禍載在史冊事跡甚明若靈濟宮所奉二真君乃南唐徐溫二子知證知諤謹按正史所載徐溫養子知誥篡偽吳王楊氏諸子皆為節度使知證夫死知諤病死五代石晉時無故立廟稱之為神國朝雖有廟宇然亦止稱為真人今道士供奉香火成化末年加為上帝禮官失職



不能規正

先帝初年革去帝號天下傳聞以為

聖政真君舊稱尚未盡革至於神父神母僂妃皆是僭叛  
家屬濫冒美名尤為非禮每歲三大節分官祭祀不知  
何時復遺內閣儒臣臣等初承遺命未敢固違因循至  
今勉強從事恭遇

孝宗皇帝崇儒訪治舍已聽言方欲具奏論列而

龍馭上升徒深悵慕近者文華殿所供佛像有旨見新令  
臣等撰文祝告臣等以為事關治體據禮上陳荷蒙  
聖斷即時撤去仰見

陛下聰明正大遠過百王善推所為雖堯舜之治不難致

皇明實錄

正德二年

三

矣靈濟真君生為叛臣死為逆鬼而冒名潛禮享祀無窮惑世誣民莫此為甚臣等讀聖賢之書當勸

陛下行帝王之道心知和偽而身與周旋則講讀者皆成虛文輔導者更為何事且有其誠則有其神無其誠則無其神縱使有之亦須誠心對越乃能感格臣等心既不信誠從何生強使驅馳雖祭無益若先師孔子遺祭舊規臣等自當竭誠奉命其一應寺觀祭告自來並不干預伏乞

聖明洞察俯聽愚言將前項祭祀通行革罷免令臣等行禮先帝並號於淮政之初

陛下並祭於嗣位之始傳之後世於前有光庶祀典不愆

治體無累而臣等疎官失職之咎亦少逭於萬一矣  
上嘉納之且曰二真君之祭據禮當革但

先朝行之已久姑仍其舊今後不必遣內閣重臣止令太  
常寺官行禮

○正德八年七月壬辰革滁陽王墳奉祀郭琥職王無後  
國初以蜀王主祀蜀王之國掌滁之衛事者主焉琥定  
遠人弘治間自言為王後

孝宗賜以冠帶又授楊徐二王例乞奉祀亦與之廟戶王  
璽等數辯其妄至是琥復乞留署印下吏禮二部議曰  
王奉祀典禮定於

聖祖勅諭非所敢更其曰無後又見於所製碑非可攀附

先帝假琥以祠職由覆議者失詳今乃求請不已宜奪其職  
上是之曰除陽王祀禮悉遵

皇祖所定琥仍如

皇考初命以冠帶榮其身如再奏擾必罪之

嚴宮禁

○弘治十八年五月壬子禮部尚書張昇等言

人行皇帝賓天宮殿門禁正當嚴肅以機密出入辨別內

外乃政體之不可緩者近聞真人陳應循西番灌頂大

國師那卜堅叅及班丹羅竹等各率其徒假以袂除薦

楊數入乾清宮

凡筵前肆無避忌京師傳聞無不駭愕請執應循等真子

法革其名號追奪印誥及累年所得賜賞仍照例黜逐  
發遣

上曰卿等所言是應循等姑免逮問所冒職事封號俱查  
革印誥并所賜玉帶送所司交納今後僧道敢有夤緣  
出入宮禁濫設齋醮者并引誘之人俱罪不宥

恤民

○正德元年三月戊戌戶部覆大學士劉健等所奏請追  
收商人譚景清等殘鹽引目給與原價其皇莊田土不  
必差官往勘請令巡撫都御史查明召人領種每年子  
粒有司如例徵完解部轉進

兩宮其內庫金銀等項請依太監龍綬所奏非具本傳取

者勅下司禮監會同內閣查究用餘之數責令還官

上曰莊田第令巡撫官勘明子粒有司徵完交管莊內官  
進納內庫金銀等項令該庫經管官員查奏

○四月癸丑戶部言長寧伯周或與景州民高崇等互爭  
田土已屢移巡撫官勘理今復有旨遣郎中等官往勘  
恐防廢農務重為民害宜如都給事中張文等奏停止  
上曰農月不宜擾民其勿遣

○五月丙申內織染局奏行蘇杭等府織造  
兩宮

上用等段計二萬四千七百七十疋尚書曾鑑等言四方  
多事公私匱竭科徵不息民何以堪宜暫停或量減

上是之曰既連歲災傷其減三分之一以甦民力

○七月乙未南京六科給事中石祿等奏頃歲山移地裂水旱頻仍風霾蔽日雨雹殺人為變不一被災之所宜遣官賑濟招撫或蠲其賦稅減其科徵戶部尚書韓文等覆議水旱災傷無處無之若槩欲差官恐徒勞無益宜俟奏報至日量其輕重如例上請蠲貸惟江西南贛建昌等府之民死於嵐瘴者無筭直隸鳳陽等府大雨如注平地水深丈有五尺沒民居五百餘家陝西寧夏左屯衛紅氣薰天繼以猛火燬城樓臺堡官軍房屋牲畜盡并傷男女三百五十人是乃異常之災宜移文各該巡撫官親詣其地加意撫恤貧民之困於差役者

即與優免廬舍之淄沒營堡之燒燬者官給錢糧量為賑濟仍督所屬官吏招撫流移禁革科擾庶災異可弭上曰民困可憫其如擬

○十一月乙酉巡撫順天等府都御史劉應辰言順天永平二府并各衛所差役不均審戶雖有三等九則之名而上則常巧於規免論差雖有出銀出力之異而下戶不免於銀差且有司均徭當出於人丁近年兼收地畝軍衛均徭當出於餘丁近年兼派正軍姦弊難稽民窮財盡必須總括府衛所當用之役而均派於所見有之丁仍省冗差革妄費重必辦於富勢輕則及於貧窮而後畿民始得其所乞行戶部差官查處戶部議其言可



行請如擬但官則勿差可也

上曰然近來徭役之不均者多矣其令應辰悉心整理務使均平以紓軍民之困

○正德四年正月庚申巡撫都御史羅鑒奏丹陽金壇二縣民饑尤甚請借撥蘇常二府各米一千石穀九千石賑之其蘇松常及嘉湖等府米亦騰貴宜放預備倉糧減價量糶貯其銀於官俟年豐糶穀備賑戶部覆議如

鑒言

上曰歲歉民饑朕所軫念借撥放糶俱如擬行之然賑濟之惠當先及於小民務須計處周詳不可使豪右之家挾勢規利致生姦弊

○二月庚寅南京守臣以修省上言請停徵科罷工役一  
成造

上用箭弓彈弓等物原差太監每歲供給下程用銀二千  
餘兩今事已完結宜趣令回京不許延住糜費一織造  
婚禮及賞用段疋為價一萬一千六百餘兩宜緩解其  
半以紓民力一修御馬監西海子承光殿及龍鳳船取  
物價三千三百兩有奇又修盔甲鑄錢熟銅宜以徵在  
官者輸部餘俟豐年補之一南京供應織造太監下程  
工食歲費銀五千四百兩有奇宜以應天府庫貯無礙  
銀給之以蘇徵派小民之苦工部覆奏

上曰南京根本重地也今罹災重人民艱窘諸造作費用

數多無從出辦情實可憫所差大監令速回毋得久滯  
物價物料未徵者宜暫停免待豐年補還其供給下程  
工食何至歲用數千守備官可備覈其數所司亦何可  
分外承奉自後無額式者其盡革之母困吾民

○十月癸卯巡撫湖廣右副都御史王綸奏境內歲屢侵  
預備倉糧已竭欲行武昌會城及漢陽府漢口劉家隔  
等處禮勸富民納粟賑濟而立表刻石以旌之若恃富  
黨惡不從者疏聞寃治戶部議覆荒政在於恤民若窮  
州下邑槩欲勸分恐官吏乘機科害是窮民未必蒙福  
而他方先以受擾矣武昌漢陽富商大姓頗多宜如擬  
勸借出米千石以上者表其門九百石至二三百石者授

皇明實訓

正德二卷

三三

之散官自從六品至從九品凡四等仍立石刻其姓名  
其餘州縣原有侍郎畢亨奏留餘銀可備賑濟不必勸  
借今年該徵兌運糧米亦宜從寬量折十五萬石而以  
其加耗為給賑之助災傷分數則宜亟報而蠲之

上是其言曰勸分固救荒權宜之法但近年逼迫太甚民  
情不堪其令鎮巡官再行斟酌惟會城等處如擬禮勸  
亦須富室樂從不可強之坊表聽民自立有司勿與其  
餘州縣則宜勿擾以安人心折支徵免俱如擬

○正德五年十二月丙申內承運庫奏缺賞賜段足請令  
工部如例發官銀收買萬五千疋以備急用仍下浙江  
及蘇松司織造者催督解納年終不完者治罪工部議

先買五千疋而分派浙江及蘇松等府亦各五千差官督解得旨令工部買納如數浙江及蘇松地方災傷民窮盜起朝廷已寢差官其派辦之數亦併免之以俟年豐

○正德十二年六月己未詔查革天下新設抽分處所及禁約各鎮守衙門橫索助貢等項銀兩從御史胡文靜奏也

寬貸

○正德五年五月戊寅諭寧夏官員軍民旗校人等近寘鐫何錦等謀反神人共怒朕念爾等皆朝廷赤子為其迫脅心不自安已有旨曉諭其寘鐫何錦待解至京依法處治有功官軍已降勅獎勵待報功至日另行陞賞

爾等世受國恩縱是一時道脅勢非得已並行寬宥况朝廷節次薄稅省刑事從寬處爾等宜各安心保守職業同享太平之福鎮巡等官并家口被殺者與之棺斂見存者與脚力口糧送在彼閒住被傷者聽回原籍致仕官軍人等被殺家屬各賞銀五兩被傷者三兩今巡按御史查處回奏

○八月己酉詔官員犯罪充軍應放免者不分永遠字樣悉皆放釋已釋放者免赴伍其為民不犯賊者仍冠帶閒住內遷發為民者仍查原犯事情以聞從都察院奏請改正瑾之弊法也

賑濟

正德三年十一月乙未戶部言鳳陽淮安揚廬等處災  
荒重大累經守臣奏請簡命大臣前來整理錢糧以救  
餓莩先已勅侍郎王瓊賑濟南京矣南京離鳳陽不遠  
宜命瓊往來鳳陽等府會同鎮巡官從長計處設法賑  
恤本部先運事例銀十萬兩前往接濟仍量支南京各  
衛倉糧三十萬委官搬運驗口給散乃撥補未解事例  
銀十五萬兩送南京戶部折放官軍月糧

上從之仍令侍郎王瓊就彼賑濟務使民沾實惠不致失  
所若有救荒事宜其悉以聞

○正德七年正月癸丑初太監張永傳旨山東等處盜賊  
殘破州縣累蠲稅糧而有司廢格不行以致上無實惠

民罹困苦令戶部議處以聞戶部覆議謂兵荒山東為甚河南南北直隸次之宜會計經費以定减免之數一京儲凡已徵未解者山東即留本處備用河南南北直隸許折輕齋解部召商上納其未徵係內府供應不容免者則於已徵銀內通融補解其他京倉京場糧草及神樂觀犧牲所雜糧俱免各衙門應用等項先查存積盡支不足則於太倉及五場給之一邊餉山東河南南北直隸原派各邊及畿郡倉庫錢穀未徵者亦俱免已徵未解者山東亦留本處河南南北直隸亦許輕齋類解其各邊糧草將正德五年六年兩准監課於宣府開中六十萬引遼東三十萬引召商上納賊未殘破州縣



已徵者則以補內府不充之數山海等關許於附近存積多處通融借用或查各庫積銀折放一祿俸各處存留糧數以供各王府及司府衛所州縣祿俸宜以賊未殘破州縣原派并被賊州縣已徵未解者量派本處以給之山東則益以臨清稅課二季其各屯子粒亦俱免又各處有雜辦果品等項及禮兵工三部牲口柴薪物料俱請令各部會計減免從之

○四月丁亥傳旨諭戶部北直隸山東饑前發公帑恐賑濟不給其再發通州倉加耗附餘并天津德州臨清所寄糧二十萬石仍量地之遠近災之輕重定數支給於是戶部議定順天二萬石永平一萬石俱支於通州倉

三十一日

二卷二

三十二

保定河間各一萬五千石天津五千石長蘆運司二千石俱支於天津倉真定大名各一萬三千五百石廣平順德如永平之數青登萊各一萬三千石濟南兗州東昌如保定之數山東運司如長蘆之數俱支於德州臨清倉從之且勅侍郎王瓊隨宜區畫務俾窮困即沾恩惠○正德十三年正月癸卯戶科給事中李長奏直隸山東地方霑潦瀰漫五穀絕望京師流民相屬於道携妻與子僅易斗粟僵尸枕藉所不忍見初意皆以京師輻輳之地可以乞食糊口既而米價騰貴遂至此極乞從權處置先將已故者堊埋無令暴露其羸弱僅存者量給米銀令各回鄉戶部詳覆

上曰流民情可矜憫人給米三斗令各歸其鄉以聽賑濟死者官為瘞之各巡撫其督有司加意撫恤毋致失所戶科左給事中邵錫言去秋雨水為災秋成失望順天保定河間被害尤甚真定大名等五郡次之人民艱食餓殍盈路流移不止盜賊將起非細故也

陛下垂念發戶部銀兩德州倉糧遣郎中二人賑濟竊恐待哺者衆所發不足以供所需郎官權輕無人督率群吏請別遣大臣增發銀穀以往其稅糧物料仍乞例外蠲免以蘇民困戶部覆議以聞

上曰畿郡災傷人民艱窘實切朕憂其河間順天保定存留糧米坐派物料各暫停徵仍勅大臣一人率主事二

人分行賑濟應支錢穀令議處奏聞真定等府即令巡撫都御史李瓚臧鳳督率所司理之缺牛種者官為補助務俾人沾實惠於是以前都察院右僉都御史李鉞督順天河間保定等處

掩骼

○正德十一年三月乙酉詔都城內外各寺觀寄放胔骼有主者立限收葬無主者隨地瘞之仍諭兩京及各布政司如例舉行

弭盜

○正德六年三月戊辰以賞罰條格榜諭有賊地方凡府州縣官衛所為賊所破殺掠焚燬數多者掌印及職

專守備捕盜官皆斬雖無城池罪亦如之府衛掌印分  
管及兵備官每一起降一級分守分巡官及三司掌印  
官遞降其甚者各謫戍士卒臨陣不用命者斬鎮巡叅  
將等官許以軍法從事所轄地方盜發匿不以報者罷  
職因而失事重者亦斬兵備守備守巡等官聞賊退縮  
貽患地方及鎮守巡撫官不能弭盜巡按御史不能督  
捕糾舉者俱黜之凡有為賊鄉道以復私仇及為賊耳  
目令得奔逸者斬仍罪及其孥凡就陣擒斬有名劇賊  
一人者如邊方例陞一級世襲擒斬從賊三人及陣亡  
者亦如之若非對敵緝捕三人及三人以下者祇如舊  
例陞賞其有捕斬功應陞級而不欲者每劇賊一人賞

銀三十兩從賊一人半之緝捕一人減三之二若盜賊能自相擒斬者得賞其罪仍如例一體給賞脅從能自首者亦賞其罪毋令捕盜者追詰之守巡以下文武職官有督捕保障顯績者鎮巡等官舉奏擢用

○丙子太監張永傳旨近來各處盜賊縱橫多因水旱衣食艱難各有司不能賑恤或又稱科歛而侵剋之及朝廷下詔蠲免錢糧乃將虛文起解之數捏作已徵或將已徵捏作未徵重復徵解以致小民冤苦無伸流離失業相誘為非苟逃性命日復一日轉漸增多念此良民皆吾赤子情非得已實可哀憐已累降勅旨申明戒約誠恐安於故習不改前非徒事虛文民不沾惠都察院

即出榜文分給直隸山東河南四川江西湖廣陝西福建兩廣用兵地方各鎮巡等官行各府州縣並相騰刻張掛曉諭備查正德五年分正額稅糧草料之外一應歲辦雜派軍需諸物料實係已徵在官者如數起解其小民拖欠未徵及有司畏懼期限虛報已徵之數悉皆蠲免其被賊殘破處所并正額糧草通免一年以蘇民困虛報官員免其查究不許再犯如小民陷於盜賊有能悔過復業者除有名賊犯外凡脅從之徒不必追究既往量加存卹令其安心生理共享太平以後再作過惡必不輕宥有能自相擒斬悉免本罪仍量其功次即加賞勞重者量為陞職若有司將自首人犯擒斬報

功或故為沮抑不加賞勞以致人心嗟怨及仍前尅害  
虛應故事發之日一體重罪不宥

○四月壬寅六科都給事中張瓚等言近山東巡撫都御  
史邊憲巡按御史陸芸紀功御史吳堂提督捕盜叅將  
李瑾各奏青城之捷已蒙陞賞據其奏辭日時不對自  
相矛盾瑾等既稱賊不能突出芸乃云掘城而走芸報  
賊以二十一日潰圍去瑾等則云二十二日斬獲甚多  
疑有欺蔽乞勅總制都御史馬中錫覈實奏處會芸劾  
瑾初至山東賊遁在諸城縣之百尺河瑾擁兵不敢擊  
乃掠平民為賊輒以奏報及賊劫日照瑾復留駐青州  
賊因乘虛西向破泰安魚臺諸州縣後至新泰小捷遂



回兵濟南致賊陷沂水臨朐直取常山幸而青城為官軍所圍中夜賊潰圍出復破昌維諸縣瑾握重兵屢失機會請罷瑾別選將代之或切責俾圖後効兵部乃請令中錫併覈以聞十三道御史賀銳等亦以為言且謂山東居民凡賊過之處則樂於供給糧草器仗皆因於民棄家從亂者比比而是官軍所過之地則即避門逃避箠楚驅逼猶不肯前懸賞召募亦鮮赴者蓋以供億之煩搜索之苦或掩殺報功尤甚於賊故爾今所報斬獲首級未可輒信得旨諸所奏事情已令中錫覈報俟其至日朝廷自有正法張偉令嚴督各該鎮巡叅將等官亟討賊以圖成功官軍所過州縣不許生事擾民仍

諭四川等處用兵地方總制鎮巡官但有貪功妄殺縱容官軍害人者咸重罪不宥

○六月戊戌巡撫陝西都御史藍章奏盜藍廷瑞為永順土兵所逐奔漢中都指揮使金冕土官知州彭定等圍之食竭力盡令其黨何虎等告乞還四川聽撫已令冕等護之出境兵部議廷瑞稔惡數年兵敗求降乃縱之使出似為非策宜令總制尚書洪鍾等辯其真偽誠否而審處之使法不廢而信不失若中變道走則調兵征剿得旨盜皆朝廷赤子其初起及脅中從多非得已今既聽撫速令總制鎮巡官議處以聞

○十一月戊辰

上諭兵部臣曰南北直隸河南山東強賊劉六劉七齊彥明楊虎等肆行叛亂侍郎陸完等討捕累以捷聞殄滅有期朕念天下軍民皆我赤子比因水旱災傷各司府州縣衛所官不能撫卹或催徵大急或科歛繁重或刑罰不平陷於為盜情實可憫已命侍郎叢蘭王瓊往宣布朝廷德意惟有名首惡不宥能擒斬者已有陞賞格例其餘脅從者皆非得已有能拋棄盔甲器械投首者管軍官即與辯理發遣不許濫殺其自解散者沿途官司不許邀殺報功俱量給衣糧次以送還鄉原籍官司給與牛具種子田地為人侵佔者各還本主仍復三年或攀指舊事者並免追究兵部即出榜刊布提督撫按

及各府州縣遞為翻刻務使各鄉村屯堡軍民知悉安  
分為善無互相驚疑若冥頑不改仍出為盜自取刑誅  
再不輕宥官司敢有奉行不至仍前急玩虛應故事者  
總督等官指實叅奏重治四川江西等處盜賊令總制  
尚書洪鍾都御史陳金及各撫按官如旨奉行

○正德七年正月丁巳傳旨諭直隸山東河南等處被賊  
脅從軍民人等爾等本皆良民被脅從賊盜既非本心  
及遇官軍又遭殺戮朕甚憐之累有旨許投首免罪爾  
等愚頑不省今再曉諭使皆知悉除賊首劉六劉七齊  
彥明劉三趙風子邢老虎赦所不原其餘但能解甲投  
首者俱勿論仍復其身三年戒飭所在毋得擾害朝廷

夫不失信至於各處災傷被賊地方一應錢糧物料俱依前旨蠲免不許有司虛應故事總督提督并各該鎮巡及司府州縣等衙門各騰榜曉諭

○十月辛酉傳旨申諭直隸山東河南江西四川等處頃年盜起殘害地方皆因賊首數人糾合徒衆中間多是良民畏避糧差被其脅從朝廷命將出兵又再三降旨榜諭許其解散自首俱宥其罪仍令有司存恤各各路官軍將賊首藍五駝老人趙風子陳翰李茂賈勉兒等俱生擒凌遲汪澄二胡雪二劉三楊虎邢老虎劉六等俱劉殺劉七齊彥明劉屍梟首示衆其窩藏交通之人如王欽王五等俱凌遲處斬已勅各處鎮巡三司官

曉諭軍民為惡者自取其死為善者得保身家猶恐府州縣衛所官不能用心撫卹領軍官失事懼罪殺降報功使人心驚疑不安又令兵部嚴行各官解散投首者令依前旨免其糧差三年田地被侵者追還原主無牛具種子者措置給之失事官量情輕減不許妄殺務使人人為善同享太平朝廷屈法伸恩如此其四川殘賊廖麻子一黨昏迷不省己別遣將督兵剿殺除廖麻子不赦其餘解散自歸一體寬恤惟既散之後不改前非仍復為盜者所在擒執重治不宥中外有司通行榜諭知之

○弘治十八年七月己酉

先帝時南京監察御史沈齊等言

皇上親錄大理少卿吳一貫等所勘邊情於闕下事干刑獄宜付所司不必親勞

聖斷蓋以萬幾叢委或不暇給投閒抵隙之人將為取寵市權之計此今日之體統不可不正者也望自今政務委之九卿設或未當責有所歸則事不煩而理都察覆奏國家刑獄之事各有成規如吳一貫等勘事失之輕信以致處斷過當人多冤稱

先帝不忍之心施於偶聞乃親錄諸犯仍付法司無輕議罪十八年之間僅一見之未嘗著為常典此非

先帝之好勞乃臣下不職之為累也但齊等推明體統意

亦忠愛請繼自今刑獄悉責成中外有司并勘問官秉公訊鞠違者以故失論庶臣勞於下君逸於上而庶事亦不致隳廢矣詔今後內外法司及奉旨勘事官務秉公道根究實情不可顧忌偏枉

○正德元年四月癸丑掌大理寺工部尚書楊守隨奏每歲天氣暄熱會審罪囚事例行於在京而不行於南京五年一審錄事例詳於在京而畧於在外事體有偏刑或不當宜通行南京審囚之時三法司一同會審其在外審錄亦照此例會審具奏庶事體無一徧之弊刑罰合衆論之公

上從之且曰人命至重錄囚有徇情稽滯窺伺者令該科



參旁

上命司禮監太監張永同三法司堂上官審錄罪囚勅諭  
永曰朕惟刑獄重事自古帝王必致謹於斯朕嗣承大  
統仰體

上天好生之心特加慎重茲當天氣炎熱恐輕重罪囚或  
有冤抑致傷和氣特命爾同三法司堂上官從公審錄  
死罪情真者候決其情可矜疑事無證佐并應枷號者  
詳具以聞徒流以下減等發落笞者並釋之於是永會  
三法司具以獄讞前後得可矜疑者六十一人俱減死  
充軍其情重者仍杖之百而遣之免枷號者十有五人  
依原擬發遣以不孝告而有息詞者七人杖之百俾歸

養自首并篤疾放免者八人

○正德九年九月戊子勅諭刑部都察院大理寺曰刑獄重事凡斷決起發會勘駁勘等項律例所載俱有定限不許淹禁今內外問刑衙門官員不體朝廷欽恤至意一應繫囚或不親鞫問或徇情受騙或畏避嫌疑展轉委勘以致監禁日久有數年未結至瘦死獄中者情甚可憫法司其亟申明律例移文省諭今後再有故違者重治不貸又近年山東河南四川山西等處失事人員亦多淹禁者其今各鎮巡等官查勘明白從公議奏定奪故諭

兵政

○正德三年十二月己酉兵科都給事中趙鐸等言近年官軍比試多姑息之弊請加嚴飭得旨舊制比試甚嚴歲久人玩視為故事兵部其移文各都司應襲子孫須弓馬熟閑乃聽起送監比官必嚴比中式方許襲替不中者如例處分若監比似前怠玩必罪之仍令偵事諸司察其弊以聞

花田

○正德元年五月甲辰先是總督糧儲戶部右侍郎陳清兵科給事中徐忱各疏言倉庫空虛可慮戶科給事中張文等又極言國用不給當亟議經制之宜

上曰此重事也戶部宜會多官議處畫一開具以聞於是

尚書韓文會英國公張懋等條具經制八事詔是之仍令戶部詳究近年支用日漸增加多至數倍之由及運送各邊銀兩已用未用之數并可行長策仍議處以聞文復會懋等言銀兩之用於京軍屢出調度頻繁山陝饑荒供億加倍往者

孝廟登極賞賜悉出內帑戶部止湊銀三十餘萬兩今則銀一百四十餘萬皆自戶部出矣往者內府成造金冊皆取諸內庫今則戶部節進過一萬四千八百餘兩矣往者戶部進內庫銀止備軍官折俸今則無名賞賜無益齋醮皆取而用之矣此銀費所以日增也招收投充之匠傳陞乞陞之官役占影射之軍皆資緣權貴蠹公

營私或臣下違白而裁革不行或方行裁革而旋復仍舊深根滋蔓潛耗京儲此冗食所以日增也先祿寺供應每告不敷內監局工作畧無停息至如玉帶蟒衣一槩濫賜其餘瑣細不能枚舉此冗費所以日增也伏望皇上深懲宿弊俟諸司查奏至日應裁革減省停止者即賜施行其各邊解送銀兩已用未用數目及有無冒妄關支之弊宜行各邊巡按御史備查明造冊送繳以憑叅究所謂可行之策則各處稅課司河泊所王府舊嘗陳乞為業者不論久近盡取還官行撫巡等官稽其歲入錢鈔如例折銀山場湖陂田土或王國改遷為人侵占者盡數查出召人佃種如例徵銀應漁牧者定則

以收其利俱解部備用又沿邊屯田廢弛尤甚禾黍之地盡為草莽之區以故倉儲缺乏輸銀日多宜勅各邊總制會同巡按及管糧郎中督同巡守管屯等官清查故有并新增頃畝除已給軍領種外其間凡有權豪奪占者追究改正荒蕪未種者立法召人開墾承種限三年成熟起科或租額太重奏請量減近邊有膏腴可耕之地亦宜因時的處不必拘於禁例而久棄之又順天保定等府地方先年賞賜內官莊田有年久而其人已故家衆受價典賣或投托勲貴隱匿為業乞選差科道及本部屬官各一員會同巡撫查勘原賞頃畝遵奉先帝勅旨不及二十頃者仍與見管業之人三十頃而上

每三十頃遞除五頃與之佃種如民田例畝稅銀三分  
餘地並收入官令有司招人佃種各將租銀解部以上  
三事似亦可以少助公家之費

上曰然也田積穀乃餉邊上策漢之趙充國行於金城唐  
之韓重華行於振武其效昭然可考沿邊及遼東屯田  
其擇御史能者分行覈實然貴臻實效不可虛應故事

馬政

○正德二年四月丁酉陝西總制兼督理馬政都御史楊  
一清奏臣先年奉勅督理陝西馬政親詣苑馬寺兩監  
六苑查得原額草場一十三萬三千七百七十七頃六  
十畝存者止六萬六千八百八十八頃八十畝養馬軍

皇明

正德二年

四七

一千二百二十名存者止七百四十五名收養兒驕騾馬并孳生馬駒止二千二百八十八匹竊嘆馬政之廢至於如此夙夜講求清出實有草場荒熟地共一十二萬八千四百七十三頃有奇清勾撥補招募改編軍人二千三百四十三名銀買茶易追補孳生馬匹并駒共一萬一千八百七十一匹修完馬營城堡共一十九處衙門倉廩馬廐屋宇共四千一百餘間選設操丁一千名給與厰田弓矢委官操練無事牧馬有警調用又奏武安苑草場地二千九百六十六頃招募改編軍人三百四十五名及照西寧洮河三衛茶馬舊規廢弛年久官茶無積私販通行西域畜收盡為私販所得邊兵缺馬



乃累行伍陪償臣嚴禁私販廣積官茶內照舊制招調  
遠近番人共易兒驕騾馬一萬九千七十七匹計今三  
茶馬司處置見畜茶四十五萬餘斤足充二年易馬之  
用是以於三邊歲給戰馬不為無補至於招番一事雖  
未嘗明復金牌之規而實坐收茶馬之利臣非敢自伐  
其功但念創作者必專而後成交承者必守而無失臣  
初責任專易於集事自兼巡撫以來顧此失彼已不如  
前比者復蒙加任總制責任重大其於監牧茶馬之政  
勢不能及惟是規置粗定禁令已行分官代理幸不廢  
墜切惟馬政恭法事體相須先年陝西行太僕寺苑馬  
寺馬政俱係巡撫兼管而茶馬則巡茶御史主之巡撫

政務繁多馬政實不經意而茶司所易良鴛莫究騎操所給登耗不聞本末始終茫不相攝虛心無實亦勢使然頃督理設官兼總數事故臣得以稍效其愚此後恐難復設止令巡撫兼之未免仍蹈舊轍莫若復設巡茶御史一人或三年或二年一易請勅兼理馬政茶法二事陝西行太僕寺苑馬寺官員專聽約束凡臣布置規畫奏有成命事宜非有大碍不必更張庶幾事有定規人有定志矣兵部議覆一清為慮甚遠其言可從

上是之曰軍政莫急於馬陝西馬政自今俱令巡茶御史兼理之務令加意修舉庶幾雲錦成群之盛其勿怠

恤軍士

○正德元年三月壬午賞楊威等營秋班操軍邵斌等若千人各銀一兩故事登極之賞惟降勅時見在者以舊斌等九月番上在降勅後以方營造

泰陵援春班例欲均賞戶部覆奏謂均賞無例上以供役

山陵有勞特命減半賞之

備邊

○正德元年三月乙酉錦衣衛千戶屠璋自陝西勘事還報虜衆約五六萬以去年十二月十七日花馬池毀垣而入直抵隆德靜寧會寧等處至今年正月初四日始從舊路遁去鎮巡等官先調各衛官軍上達召募民壯

九千七百餘人委備冬把總指揮任壘等分布沿邊防守都御史楊一清又調延寧莊浪兵馬邀擊追剿然或傳報不豫或備慮不謹或應援不及或心力不齊以是失誤事機竟無成功其初入花馬池叅將霍忠等兵潰遂轉侵固原圍豫旺城壘及操守指揮陳輝與戰於乾鹽池陣亡一十八人於是由葫蘆峽口寇鎮戎所歷黑水板井等堡及靜寧州所殺虜人畜甚衆遂至亂馬川指揮張瑛把總張光宇率軍迎敵瑛中流矢死者又十八人虜大衆出錦鷄口時一清累趣兵併力截其歸路然皆坐視不戰惟指揮郭邈追及餘賊六騎於小鹽池與副總兵姜漢守備都指揮倭勳部下各斬首二級所

獲僅達馬夷器而已今賊雖已出套東渡顧虜性譎詐  
佯若北遯其謀叵測况固靖等處糧草多者或足支主  
兵二年少者僅半年如有警動調客兵則不足矣兵部  
覆奏璋所勘與一清奏報相類諸將功過待覆奏勘處  
之防禦之策宜行一清督各鎮守臣豫處邊儲宜責戶  
部區畫以備不虞

上是之曰其令一清督各鎮巡等官用心計處防禦不可  
有纖毫怠忽糧草前此差官整理方以充足歸報今乃  
又稱不足矧戶部其從實查處以聞

○正德八年八月乙丑兵部覆給事中傅綸所奏備邊事  
宜一遼東錦義等城堡圮廢壞是以寇至莫禦宜令修

明武宗實訓

卷二

五十一

補并河東等處皆添設之一各邊軍士貧難銳氣銷矣  
無以禦敵宜令官為婚娶及置辦軍裝仍每軍復余丁  
二人專令耕種以資助之一選擇總兵不必俟伯兀都  
督以下素有威名未曾委任或在下僚及註誤間住者  
宜疏名簡用一各邊被虜人民在虜日久每遇征剿之  
時踞而請命官軍貪功一槩妄殺宜令定格例凡獲被  
虜男婦老少俱准陞級仍令本家出銀充賞如仍前妄  
殺斬首示衆一廣寧開原舊設馬市所以羈縻諸夷互  
市之日宜嚴為之禁其各城索賞夷人俱出百里之外  
使之駐牧或近塞垣者即驅逐之則在我無取象之端  
在彼知潛入之戒矣詔是之且今馬市驗放夷人入市

務依期出境禁其夾帶弓箭之類非互市日不許輒近  
塞垣管馬市官并備禦軍士有誘取夷貨縱令入境及  
私交通漏泄者罪不赦

馭外國

○正德二年五月己酉命朝鮮國李愔之弟晉城君懌署  
理國事愔病無嗣奏請以國事付懌禮部議移文覈實  
至是其國議政府具舉國公議申請禮部又言愔雖病  
必其不愈而果於無嗣也况懌既有賢稱亦豈肯自處  
於薄宜令暫署事務以忠孝自存俟愔卒乃具奏議封  
上從之賜之勅曰爾兄國王愔以世子顛夭亡哀慟成疾  
無他子姓令爾權署國事請命于朝爾國宗戚群臣咸

三  
日  
實  
訓

正  
德  
二  
十  
卷

五  
十一

奏爾為王親弟孝友好學夙有令望宜代承先緒而爾乃以不敢自明益增墮越為辭上下之間交盡其道顧封國事重特下禮官及廷臣僉議以為古者兄弟有相及之義但爾國素號秉禮而爾方執謙處厚茲特命爾署理本國大小庶務以國王體統行事爾尚益敦孝睦以繫群望統厥臣庶綏爾家邦朕將有後命焉欽哉

○正德十四年二月己卯初高麗國王王氏洪武間遇弒而絕陪臣李仁人擅立偽姓凡幾易矣國人得王氏裔瑤立之瑤復昏亂眾推門下侍郎李成桂主國事且請于朝詔許之改名旦令徙居漢成更號朝鮮成桂與仁人本異族永樂間降祭海嶽祝文稱成桂為仁人嗣而



祖訓條章亦載仁人及子成桂今名旦者成桂子芳遠奏  
辨

太宗許令改正近所修大明會典復注

祖訓於朝鮮國下云季氏連弒四王貢使市以歸國王李  
懌上疏備陳世系本末及四王始終無弒逆迹乞為改  
正下禮部議以會典一書詳載我朝制度其事關外國  
是非嫌疑之間皆在所畧况成桂之得國出

皇祖之命其不繫仁人後又有

大宗明詔可徵宜從其請詔可且嘉其誠孝賜勅諭之

優遠人

○正德三年十月丙子禮部以大通事王喜奏雲南百夷

緬甸及宣慰土官衙門例用三年一貢今皆不通宜移  
文鎮巡等官以時促之

上曰土官貢賦自有舊制其勿紛擾仍行各省鎮巡等官  
知之

○正德九年九月戊辰先是巡撫貴州都御史沈林等奏  
牽西苗賊阿雜等之叛由宣慰宋然激之今然既罷職  
復使其子姓承襲恐夷民不安宜將貴竹平伐等七長  
官司并洪邊十二馬頭地方金筑安撫二司總設為府  
洪邊貴竹各設縣皆以流官撫理然姪儲及長官宋齊  
改授軍職兵部請下鎮巡等官詳議至是巡撫都御史  
陳天祥等復奏各長官司夷民不願開設府縣况貴竹

二司舊隸水西宣慰安萬鍾金筑等司舊隸程卷龍里  
府衛初非然所部儲及齊宜各襲授原職兵部覆奏詔  
曰夷俗有不可盡以常法治者儲齊准仍襲原職令與  
萬鍾等俱用心管束夷民毋得科害激變再有違犯者  
鎮巡官劾奏罪之

○正德十二年三月己丑海西嘔罕河衛夷人褚養哈等  
入貢道永平擾害驛遞遼東伴送舍人傅鐸奏之禮部  
議悉認大通事譯審明白嚴加撫諭禮部仍量差通事  
送歸既而海西兀者等衛夷幹黑能等歸伴送舍人亦  
請遣通事護送遂著為令

1409376 910•1256  
6738•1

明武宗實訓 卷二

五三

大明武宗毅皇帝實訓卷之二終